



西江志卷第十二

山川六

南康府

廬山在府城北約二十里脈由桂嶺北折素瑞迤武寧東孕  
 結茲山禹貢云過九江至于敷淺原蔡沈書傳謂當指廬  
 阜也酈道元水經注引山海經廬江出三天子都入江彭  
 澤西一曰天子鄣山水相依互舉殊稱明不因匡俗始矣  
 後人因匡君姓呼為匡山又謂之輔山靖廬山宋開寶中  
 避太祖諱更名康山今仍稱廬山茅君內傳云洞天三十  
 六其八曰廬山名山靈詠真之天周景式廬山記云高二  
 千三百六十丈釋慧遠記云大嶺凡有七重圓基周迴垂  
 五百里風雲之所攬江山之所帶高巖仄宇峭壁萬尋幽



岫窮崖人獸兩絕伏滔遊廬山序云廬山者江陽之名嶽  
背岷流面彭蠡蟠根亘數百里重嶺桀嶸仰插雲日周必  
大廬山後錄云有九十九峰櫛比磬折如城堞然李白詩  
銀河倒挂三石梁香爐瀑布遙相望歐陽修詩六月飛雪  
灑石缸蓋廬山以瀑勝也鼂補之詩五百僧房綴蜜脾宋  
時宗風之盛略可想見廬山舊志如劉煥陳舜俞所補馬  
玕李常所續及朱端章拾遺二十卷戴師愈文物列傳十  
三卷今皆失傳存者為桑喬廬山紀事但宗臯詩文紀釋  
定曷通志吳煒新志康熙戊戌星子知縣毛德琦合刻廬  
山志凡十五卷

前山在府城東南里許宋馮去疾有別墅因以自號對峙者  
為後山在府城西一里宋陳圓隱此

層城山在府城西五里今謂之烏石山晉陶潛遊斜川詩序  
臨長流望曾城即此又西二里為玉京山其地名上京陶  
詩所云疇昔家上京也

鳳皇山在府城西南十里湖漲時山勢浮若鳳翔又名流星  
山今改呼福星相近為錦屏山下有錦屏鋪東古山其上  
有法輪院下有法輪井前有石門梅花洞從寺東行為臺  
石刻觀瀑臺三大字其西為西古山上有西古寺下有石  
門釣魚臺又東古山觀音巖之西北為洪井山傳是葛洪  
煉丹處

錢家山在府城南十五里又南十五里為一字山兩水夾出  
蓋府治之賓山也一名藍車山迤西為精舍山

石照山在府城西十五里潯陽記云有圓石依崖明淨如懸

西江志 卷十二  
鏡然又西十五里爲黃龍山舊志云秀聳磅礴周五十里相傳唐廣明中有龍見故名山有兩巖讖云三爪踏三溪謂沙溪豬溪龍溪也西麓有通書院或曰淵明故居或曰宋以來星子所立以祀靖節者北麓有二池曰溫泉

象山在府城西南四十里形如象又府城西五十里有觀羊山

顏家山在府城北五里相傳顏魯公嘗居此山前有龜眼井明知府田瑄鑿其側有向家山宋縣令向沈嘗遊又北五里爲朱家山宋朱弼故居其東爲白鶴觀唐開元道士劉混成煉丹處蘇軾詩所謂長松蔭庭風日清美者也

幽邃山在府城北棲賢橋西宋馮京愛其幽絕留止讀書未幾擢第有古松京所手植李家山在府城北五老峰下因

李公擇所居得名山麓有寒泉亭蘇軾所品題也軾又爲公擇作李氏山房藏書記今含鄱口之西楞伽院內白石菴乃其故址

定山在府城東北十餘里並湖兩端大而中小形如金鋌龍塘山在府城西北三十里峰巒峭拔環抱湖灣又西北十里爲屏風山丹霞紫壁如屏障然

石牛山在府城北三十里亦名鬪牛山相傳女真李騰空蔡尋真所憩上有碁枰石又北十里爲青山其東北爲香山多產香草

吳章山在府城北四十五里廬山之末一名吳障山吳所保障也過此即九江界

西山在都昌縣西一里明弘治間知縣王珀奏立經歸先生

陳皓祠其上有八仙臺雲住石空遠石

釣磯山在都昌縣南五里相傳晉陶侃微時垂釣于此得一梭化龍而去

石壁山在都昌縣西南七里臨大江有石如壁謝靈運嘗居此有石壁精舍還湖中詩明正德間提學李夢陽重鐫石壁精舍四大字縣西七里有大磯山一名望仙山頂有平石世傳晉許旌陽拔宅飛昇蘇耽於此望之山麓出磯子鉛禁不得採又南為小磯山

芙蓉山在都昌縣北十里山巒大小相對如芙蓉然縣東北十里有赤石山上為饒州界下乃湖口彭澤之通衢

元辰山在都昌縣西四十里道書第五十一福地又名蘇山晉蘇耽居此有丹竈石杵白履跡源馬跡洞橋井其下為

顯福觀

陽儲山在都昌縣東四十里居衆山之南謂其陽氣所鍾故名其巔有石房白晝昏黑持炬亦不可入

團鳳山在都昌縣北五十里下有宋龍圖學士吳中復祠又北十里為雲泉山有泉出雲號曰雲堆明劉存芳居此引其流為洗墨池相近有檀樹山明儒劉柏石墓在焉

蜈蚣山在都昌縣西六十里接新建縣界又西二十里為左蠡山臨彭蠡湖東上有龍神廟下有左蠡城今圯

城山在都昌縣西北七十里宋檀道濟築城於上又西北十里為土目山巨浪衝激其孔如目下即土目湖連湖口縣界

華山在都昌縣東北九十里其高壓衆山擬之太華又東北

十里爲黃金山山頂有龍湫禱雨多應下有大石數十丈  
飛泉噴落又名飄水巖

歐山在建昌縣西南三十里紆迴峻極頂常出雲本名雲居  
山世傳歐岌得道於此西有卧龍洞宋僧了元結茅處詳  
見雲居山志

錦山在建昌縣治西北隅又縣西一里雀鳴山舊建儒學於  
上今址猶存

鳳棲山在建昌縣西十五里山勢旋伏如鳳有同安寺

蟠龍山在建昌縣西南十五里形如龍蟠上有獅子象王佛  
頭鉢孟諸峰臨湖有太子洞

將軍山在建昌縣北十六里舊名軍山有漢樊將軍廟

越山在建昌縣西四十里上有平窩四周如城可避兵亦名

越王寨又西十里有迴城山高峰峨然險踰城郭

長山在建昌縣西南五十里與龍安山相對宋岳飛屯兵於  
此李成屯兵於龍安之北飛望見成軍陣勢遂邀擊於樓  
子莊大破之

下城洞山在建昌縣西七十五里中有鐵封墓傳爲吳王陵  
去桃花峰三里許下城門水所出也

西山在建昌縣東四十里縣之巨鎮迤東靈跡大半屬新建  
縣界

台山在建昌縣西三里俗呼擡頭山明嘉靖間知縣李恒敷  
改今名

文山在建昌縣南十里朱子知南康軍登覽此山愛其峰巒  
秀麗故名又南十里爲仰天獅山相傳宋黃真君修煉之

所上有石屋二重

睡虎山在安義縣東二十里上有宋鎮撫張松墓又東十里為五名山林巒疊聳石澗深曲又東十里為筆架山相傳鄧真君得道處鑿石為祠又有兆州山巖石磊落其形如兆下多良田民居有若州郭

五老峰去府城北三十里潯陽記云橫隱蒼空迴壓彭蠡其形勢如河中府虞鄉縣五老山商丘漫語云自下望之勢如儻立自上觀之相距甚遠巉削壁立數百千仞軒軒然如人箕踞而窺重湖又如五雲翩然欲飛湖山煙水微茫映帶東南州郡數百千里軒豁呈露可指顧而盡山志云高七千六百丈五峰之頂常有光現現則奇雲擁遏趙石梁云廬山之景盡於東南故五峰奇絕竟無有與之相抗

者誰謂匡廬無主峰也其下有李白書堂楊衡符載隱居釋道之室曰大明觀吉祥寺頭陀寺芝山寺峰之東北為九疊雲屏亦呼屏風疊其下為九疊谷奇譎不可名狀若所云三石梁及詠真洞天皆幻化非實境也北為鉢盂峰又五小峰曰獅子金印石船凌雲幡竿詳見山志

鶴鳴峰去府城西十餘里南唐鄭元素隱此鶴嘗棲鳴其上朱子詩不見山頭夜鶴鳴空遺山下瀑泉聲舊志謂形仰如鶴非也峰下有開先寺本南唐中主璟讀書臺改為寺後廢明初僧清江復建

國朝康熙癸未

皇上手書般若心經一卷賜寺內供奉丁亥

御書秀峰寺額賜僧超淵由是山南梵刹秀峰巍然稱首峰之

西南有峰曰龜背曰寨雲又西南為雙劍峰兩峰峭麗勝於山北之雙劍又西為犀牛峰梅溪集謂之牛頭巖又西南為香爐峰圓聳如爐雲煙繚繞徐凝詩盡是玲瓏石時生旦暮煙西南有姊妹石形如二女比肩鶴鳴之東北有峰曰慶雲萬杉寺在其下又東北為凌雲峰下有唐劉軻宋劉弇薛溉三書堂

金輪峰去府城西二十五里峰形如輪其南為歸宗寺相傳晉王羲之捨宅為之宋人贈僧還歸宗有占斷金輪第一峰之句旁有石鏡峰潯陽記云峰東一圓石懸崖照人毫髮必察謝靈運詩攀崖照石鏡即此又下為兜率峰

太乙峰去府城西北二十餘里在含鄱口西南峻削與眾峰殊故名太乙其下有老鷹崖廬嶽祠南為萬壽寺西南有

德勝龍潭遇旱土人祈雨每觸龍於此

石人峰去府城西北二十里有石拳聳如人狀峰之北圓如毬者繡毬峰也其下為棲賢寺亦唐李渤讀書處其寺創自赤眼禪師後廢

國朝順治甲午釋函昱復興之寺東有淨成精舍

紫霄峰去府城北二十五里相傳大禹刻石於石室中好事者縋而下摹得百餘字奇古不可辨惟洪荒漾予乃權六字可識云又傳秦始皇登此謂其與霄漢相接因名上霄峰實則兩峰並峙也紫霄峰後有編底池傳是許吳二仙遺蹟峰側有棲隱洞南唐道士譚紫霄所居其東南為白雲峰上有瀑布泉及白雲洞洞之東北有峰二曰直梭曰起雲高峻者為金雞峰其側有金雞洞俗呼洞子門南為



西江志 卷十二  
簡寂觀宋大明間道士陸修靜居此觀前有六朝松數十株今存者十四松猶作龍鱗摩霄也

大漢陽峰在小漢陽之南廬頂南大嶺也南康人謂之漢王包九江人謂之漢王坡南康志作漢陽峰蓋方言訛陽爲王耳廬頂惟此最高大東放乎桃林萬壽寺西迄乎康王谷其巔平曠無喬木下視濛濛窈不見底雖六月亦寒慄有峭壁曰禹王崖相傳大禹治水時登此峰北有巨石呼爲天鏡石其下有袈裟泉峰南與黃巖瀑布源相接

般若峰去金輪峰五里廬山西面最高處也其下有董奉館杏林東爲耶舍塔山耶舍尊者造塔以藏佛舍利塔之西南爲三將軍洞

玉巒峰去府城西三十里其西南爲佛頭峰上有隱居洞慧

日寺慧日之水經破山流入穀山湖智林寺水東南流與慧日之水合

黎仙峰去府城西五十里在廬山絕頂舊傳黎氏女昇仙處禱雨輒應有祠今廢

篁竹峰在都昌縣東北二十里原名龍王腦僧復初建菴桃花峰在建昌縣西八十里昇仙鄉其上馬尾泉飛噴如霧喧逐如雷遊者見玉屑晶瑩眩愧不自持喜懼并也嘗有桃花流出故名舊志不詳邑人熊德明爲文記之

藕峰在建昌縣西九十里頂有方石石上如兩紳拖白相傳何萬二女仙於此飛昇歲旱鄉人禱焉

羅漢峰在安義縣東四十五里依仁鄉晉許遜葬父之所相近有會仙峰舊傳遜斬蛟時會十二仙真於此

西江志 卷十二  
錦岡嶺在府城東一里宋設錦岡驛於上今建山川壇  
迎春嶺在府西一里上有社稷壇又西一里為少府嶺  
師林嶺在府城西南三十里與西古山相接有宋陳準石室  
書堂

羅漢嶺在廬山白鹿洞南數里有羅漢寺劫於宋廣濟堅禪  
師寺後有觀音塔觀音泉塔久廢寺今亦燬猶存金鐘堰  
諸古蹟張公嶺在廬山簡寂觀東南與洪井山相近

含鄱嶺在廬山之半面鄱湖若有吞吐之象故名桑疏云即  
九奇峰東第一峰也以含鄱口故別出此名山橫亘尖巖  
如火又如猛士乘馬而馳勢甚壯偉嶺之東南中豁為含  
鄱口又西南為歡喜嶺乃登五老峰之大路

鈴岡嶺即三疊谷北崖東人謂之大山其上有觀音洞深半

里許有仙人磨二圓石在嶺上相積疊如磨形

金街嶺在都昌縣治西一百八十步有玳瑁閣

石牛嶺在都昌縣東四十里高亘五里上有宋丞相江萬里  
梓里碑記

陽嶺在建昌縣西七十里嶺之西北有峽石坳與九江德安  
分界古松二株兩縣各一蒼翠競秀

長嶺在安義縣東三十里為入省孔道

卧龍岡去府城西北二十里在五乳峰之東下有卧龍菴朱  
子建以祀諸葛丞相有記

茅岡在都昌縣五都又大埠岡小埠岡俱據鄱湖之勝

馬腹岡在建昌縣北二里又縣西四十五里有千秋岡

龍頭岡在安義縣南二十里山下有潭石珠一顆俗名蒼龍

戲珠

卧雲崖在廬山五老峰前有文殊臺及鉢盂泉振錫泉麻姑崖在廬山九疊谷東北壁立數百仞舊名鐵壁峰其下有普菴洞木瓜崖在廬山石船峰西南即道士劉混成種木瓜為食處也又南為凌霄峰有凌霄巖

黃巖在廬山寨雲峰西巖有二大者可容數十人巖下有寺寺南有文殊塔雨巖在廬山漢陽峰南巖窈而深晝嘗黯黯雲出即雨

獅子巖在建昌縣南當陽津形如獅子

白鹿洞在府城北二十里廬山五老峰下唐李渤讀書處洞中蓄一白鹿故名本無所謂洞也明正德初知府王濬闢彝倫堂後山為之而築臺於上曰思賢臺知府何濬鑿石

鹿置洞中書院之設自南唐昇元中名曰廬山國學宋初列四大書院內後廢朱文公熹入奏修復之前明興廢不一

國朝康熙丁卯

御賜朱子學達性天扁額及十三經二十一史鹿洞規模煥焉

改觀詳見書院碑記亭橋泉石之勝俱詳星子知縣毛德琦新刊洞志

谷巖洞在府城北元妙觀內傳是何真人得道處

觀音洞在都昌縣西北二十里石流山下方廣丈餘一竅直達山巔內有五色土

黃荆洞在建昌縣下城洞山之左邑人熊元哲有記

棲賢谷值含鄱口南三峽澗出焉廬山之谷以三數棲賢為

大又多奇勝人樂遊之遷鶯谷在鶴鳴峰東唐侍郎何乾  
耀葬此谷內竹木深茂有水泉青牛谷在五老峰下世傳  
宋道士洪志乘青牛處又五老峰之背有青蓮谷以李白  
得名

康王谷去府城北三十五里一作釗城蓋周康王名也或作  
康陽舊志作楚王谷按楚君無諡康者從竹書作康王差  
有據又劉孝綽酬陸倕詩乍觀秦帝石復憩周王城

德星石舊名落星在府城南五里湖中高五丈許相傳星隕  
所化宋王安石黃庭堅及朱子皆有詩府城北二里有燕  
窩石在延慶院東其形似燕窩

神掌石在府城東一里石方而黑文隱隱如人掌俗呼神運  
石又府城東十里有蝦蟇石枕湖雷擊折其首

華蓋石在府城北二十五里尋真觀前朱子名以華蓋并書  
風零二字一名聖壽無疆石

定心石有二一在紫霄峰上一在黃巖之南

介石在都昌縣東南六里臨湖巨石如削因名又左蠡山有  
大石小石

五墮石仙脚石歡喜石俱在建昌縣歐山之上又有形肖龜  
蛇及鼓與頭巾者

彭蠡湖在府城南即鄱陽湖一名揚瀾詳見南昌府山川  
落星湖在彭蠡湖西北今改名德星陳王僧辯破侯景兵於  
落星灣又宋孟太后舟過落星遇風宮人溺死者數十惟  
太后舟無恙皆此處也

宮亭湖在府城東五里爾雅大山曰宮宮之命名取此其上

有宮亭廟一作邾亭三國時其神能使行舟分風上下後不復靈此湖一名神林與彭蠡相連在都昌縣西四十里者名左蠡湖

錢家湖在府城西南十里宋淳熙間知軍錢聞詩占籍於此故名距府城南十里者曰白漕湖府城西南五十里有六湖曰西廟湯家橋浦走馬硬灘龍溪龍溪湖在昔設鎮溪頭有二井泉深不可測

株林湖在府城北十里又北二十里曰馬頰湖又北十里曰大廣湖穀山湖府城東北二十五里曰梅岐湖

郭山湖在都昌縣北二十里亦名郭家湖縣西北二十里有石流湖又西北五里曰舊山湖吳江湖

大沙湖在都昌縣東三十五里地多沙因名又縣南三十里

### 有石湖

明月湖在建昌縣雲居山上其水涵澄瑩然如月

新開河在都昌縣治西一里宋紹聖間以縣境邊湖風濤不時請開此河以便舟楫且避大小磯水之湍急

後港河在都昌縣北六十里自左蠡石流背引入吳江由北廟至王家市有九十九灣春夏水漲廣通舟楫

修水在建昌縣南百步源出寧州邑人稱爲西河又縣南二十里永豐鄉之西有蛇子逕水

掘土港水在建昌縣西北二十五里宋時熊仁瞻葬母一夕暴雨成川母柩以達見朱子祭文縣北六十里有檀陂水源出德安流合修水

布水在建昌縣西南四十里源出歐山垂流三十餘丈形如

曳布又有南舍山水源出歐山之北又縣西七十里有白楊水源出白梅陂

龍江水在安義縣南一里許其源自靖安經縣境合奉新河水下出吳城鎮

馮水在安義縣南三十里源出奉新河南入花陵合修水縣東南四十里有兆州水源出兆州山合奉新水入修水

東陽新徑水在安義縣東二十里南昌鄉源出靖安與奉新河北州二水合人謂義興三合水水口縈迴唐寶應間從靈陂田中忽成大川竟達東陽津口發源處有破石潭相屬三四里漁人垂絲探之直下三十餘丈莫測其底

皎源水在安義縣西北三十里源出寶峰山險不通舟東流合修水

靈溪在府城西三十里祥符觀後相傳秦末有武士三人學道隱此一夕雷雨奄至所居左右忽成二溪磐石上有玉簡天篆曰神化靈溪金簡標題真人受旨玉澗潛棲十六字

沙溪在府城南二十里又南四十里為豬溪

鸞溪在紫霄峰下宋周元公敦頤數至歸宗寺與真淨文禪師結青松社因名寺左之溪曰鸞溪以擬東林虎溪

朱家溪在建昌縣西北六十里出虬津流合修水

歐陽潭在府城東北五里清泉鄉

玉淵潭在棲賢寺側三峽澗中諸水合流奔注潭中驚波噴空瀉下三峽潭上有白石如羊橫亘中流其南為三峽橋長幾百尺橫絕大壑橋下有龍潭曰金井兩崖石皆紫赤

西江志 卷一 三  
角立軒軒然如壯士戴橋立者其東有招隱泉泉出石龍  
首中瀉下三峽澗匯為巨潭曰石橋潭唐陸羽茶經品其  
水為天下第六舊有陸羽亭今廢

烈女潭在府城西七里清潭山下俗名雞公潭為唐家堰之  
源明正德間宸濠之亂甘氏女清秀殉節于此因名

白龍潭在含鄱口東南其水自山巔下注俗呼白水漕上有  
菴曰雲霧窟

檣樹潭在都昌縣東七十里廣不盈里而風波甚險

蘆潭在建昌縣東六十里上有市

蒲溪灣在府城西五里據層城山斜川之間晉陶潛所遊處  
也劉中允芟舍在焉後子澄葺為別墅

洗馬灣在都昌縣西萃吉門外里許俗傳陶侃洗馬於此

青樹灣在建昌縣東十五里又名珠溪世傳漢章帝元和間

明月珠出豫章海昏大如雞子即其處

玉澗在玉京山東南有橋曰玉澗橋宋崔閑居玉澗上有菴  
顏曰睡足今廢

西澗在府城西北十八里宋劉渙嘗乘黃犢往來其地因號  
西澗居士朱子為建靜隱亭及清淨退菴

清泉澗在萬杉寺東納五老峰以西諸水西南流過九洪橋  
入鄱陽湖相辭澗在石牛山南唐女真蔡尋真李騰空學  
仙術成別此故名

芙蓉洲在府城西二里與玉京山相連李白詩手把芙蓉朝  
玉京蓋指此也城南十里有鼉河洲讖云鼉河洲若圓南  
康出狀元

蓮花洲在建昌縣西江心五里舊有蓮花到縣前建昌出狀  
元之讖縣西十七里蛇骨洲相傳晉永嘉中有蛇長三十  
餘丈以氣吸人許遜吳猛有神術率徒衆往殺之聚骨成  
洲

愛蓮池在府治內宋周濂溪所鑿明成化八年知府曹凱重  
濬建亭其上又都昌縣治西有蓮池唐李俛所鑿安義縣  
北三十里有白蓮池開則歲豐否則歉

蓼花池在府城西十五里又城西三十里有宋柳宏故里池  
府志云宏本建昌人宰德化遊廬山而遂卜居星子名勝  
志云考九江名宦傳德化令無柳宏當作柳寵

洗墨池一在開先寺後南唐李璟讀書處一在歸宗寺後晉  
王羲之洗墨處歸宗寺有鵝池亦因羲之得名

流杯池在白鹿洞其崖有石劖朱子流杯池隸字朱子嘗與  
其徒環石而坐流觴浩歌其上又書流觴二字

磨劍池在都昌縣西即蘇仙淬劍之地又建昌縣有二池一  
在昇仙鄉一在冷水臺旁皆傳爲許旌陽磨劍處

潮泉在府城西南雞籠山澗中其泉日夕應潮朔望尤大  
瀑布泉在開先寺者有二其在東北者瀉出鶴鳴龜背之間  
曰馬尾水水勢奔注而崖口隘束噴散數十百縷如馬尾  
然其在西南者則自坡頂下注雙劍峰背邃壑中匯爲大  
龍潭繞出雙劍之東下注大壑懸挂數百丈曰瀑布水水  
循壑東北逝與馬尾水合流出山峽中下注石潭石碧而  
削水練而飛潭紺而淵爲開先佳境因名其峽曰青玉峽  
潭曰龍池云又簡寂觀側有二瀑布水東澗瀑廣而傷於



短西澗瀑高而病其微

玉簾泉在石鏡峰下相傳迷失草間闢之者歸宗僧蠡雲也  
旁建小閣曰觀泉由歸宗至玉簾石路甚治

三疊泉在五老峰背泉下注磐石三疊而後至地亦名三級  
泉上級如飄雲拖練中級如碎玉摧冰下級如玉龍走潭  
散珠噴雪真天下絕景非谷簾瀑布所可方朱子謂之新  
瀑恨不一見與黃商伯書屢及之

谷簾泉在康王谷其水如簾布巖而下者三十餘派亦匡廬  
異觀也唐陸羽品其水為天下第一泉之側別有雲液泉  
山多雲母石泉甘且清蓋雲母滋液所致按九江志亦載  
谷簾雲液二泉二泉之水合烏龍潭水逕康陽坂入德安  
縣界

野老泉在都昌縣治南清隱寺山頂水出石罅中清冽甘潔  
大旱不涸宋蘇軾蘇轍黃庭堅嘗遊此石畔刻野老泉三  
字呂公泉在縣北九十里呂公嶺上

溫泉在建昌縣西六十里四時溫暖患瘡者洗之多愈縣北  
五里有吳猛泉亦名冷水泉可洗瘡癩

馬尾泉在安義縣東三十里長嶺之東源出天馬山麓

明月井在府治內宋知軍徐回建亭於上嘗曰吾欲守廉如  
此泉之清

奎聚井元萬戶府鑿在縣學內明萬曆間知府田瑄掘龍門  
池得井石識曰東井與奎聚若相符云

五井俱在都昌縣境內相傳五代范越鳳過此喜其地合五  
行故濬之縣西桃源鄉有天井相傳宋末杜氏夫婦頻年

西江志 卷十二  
賜茶一日道人插劍湧泉遂成井曰吾以此報君後傳汲之可愈瘡疾一名仙井

七靖井在建昌縣城內外相傳晉永嘉中許遜嘗煉丹於黃龍山有蛟魅為祟輒作洪水欲漂丹室擒之釘於石壁還郡時海昏有巨蛇據山為穴吐氣為雲遜復誅之法北斗七星作七井以鎮并為之讚其名曰丹符靖華表靖紫陽靖御奏靖進化靖劉真靖霍陽靖然邑不改井或羽流故神其說也

### 九江府

廬山在府城南二十五里三面阻水其西通陸為羣山所奔湊其支南行者盡乎鄱陽之汜南康郡之所負也西南行者盡乎吳城其東北盡乎南湖背其折而西則盡乎湓浦

乃九江郡之所居也明王忠文禕六老堂記云其陰土燥石枯岡阜並出以扼大江東來之勢是為九江其陽千巖萬壑土木秀潤是為南康桑疏云凡登廬頂大道有三自雲峰寺入者為北道自含鄱口入者為南道自淨慧寺入者為東道

新志以雲峰為西道自化城入者為北道

道皆可輿諸他道及小徑

山僧樵子所往來者多不可縷數皆鳥道巉絕而東道南道又荒僻少人跡好奇之士間一至焉獨北道以天池寺故縉紳大夫登覽者率多由之釋定曷志云匡廬峰峰有徑徑徑達嶺亦不可不告於遊者也東南麓有相辭澗從官道分徑入石牛山上麻姑崖達九疊屏而觀三疊水也南道棲賢谷上王照嶺分徑入桃林澗登仰天坪至曬穀石達漢陽峰之巔也青泉澗有徑造卧龍岡而探崔嘉彥

西江志 卷十一  
朱晦翁之遺跡也詹家巖有徑至五乳寺而登七賢峰也  
開先寺有徑抵布水臺觀瀑布登文殊塔入黃巖而窺石  
室也簡寂觀有徑看雙瀑上黃鶯砦至廬山寺也歸宗寺  
有徑觀玉簾泉而達金輪峰禮耶舍塔也栗里有徑入康  
王谷而觀谷簾泉陟紫霄探禹跡也圓通寺有徑登石耳  
峰踰上下弔橋而進康王城七里岡有徑上白雲峰至上  
霄諸處也蓮社橋有徑入卧雲寺至龍潭菴而上聖治峰  
也蓮花洞有徑二其一進養鹿池而登松光嶺謁小天池  
之銅金仙也其一上筋竹嶺入吳賓陽之瓜圃也龍門峽  
中有徑上曇花菴至振衣峰看江州地脈之來處也濂溪  
墓旁爲官道走南則過吳章山走西至蛇岡嶺其分支小  
徑猶多有一至慧日寺者有一至天花井者

按廬山兩漢及晉皆隸柴桑縣隋隸湓城縣唐隸潯陽  
縣五代吳時隸德化縣而以山南爲星子鎮宋太平興  
國中析星子鎮爲縣後置南康軍而廬山始有分界其  
東界吳章山其西界康王坂山以南隸南康星子山以  
北隸九江德化然地勢犬牙相錯究難以壁羨起度也  
登山路徑桑疏定曷志詳言之世有問津者可免具茨  
之迷矣

天花井山去吳章山五里居廬山之末然其支散爲諸岡阜  
所行甚遠其東北行者爲烏稍嶺丫髻山而丫髻之支又  
有九其大者爲鳳凰栗樹長嶺諸山長嶺之支西踰磨刀  
澗自潯東門入爲道府諸公署而盡於湓浦又小支自栗  
樹嶺益西爲城南石塘鋪諸岡阜而盡於孫家湖山勢踴

躍軒舞以趨潯陽九江府實處其末了髻山側有地名天子堂穿鑿斷裂自烏稍了髻至潯陽東門外凡三鑿之了髻所鑿處名缺子坳當兩山間溝而絕之深八九尺廣五六尺俗所傳銅釘狗骨厭勝之說與程史所記無異

大孤山在府城東南彭蠡湖中屹然獨峙又名鞞山潯陽記云山形如鞞高數十丈大禹嘗刻石紀功有乞食烏嘗逐客舟行舟人搏飯投之即接食高下不失明嘉靖間建塔其上後傾圮今重修俗以立廟之山爲大孤者誤

延枝山在府治東距府城南二里爲欽天山環繞城郭

螺子山在府城南十五里由雙劍峰發脈蟠結宛轉如螺子形

雞籠山在府城西南四十里山有石雞冠距如生

落柁山在府城西四十里圖經名甘泉山昔山上有一船柁從頂沿流而下其水亦名柁下溪俗譌駱駝山又西二十里爲義門山與株嶺高良二山相接義門陳氏居其下

龍門山在府城西南五十里與落柁山相對如門湓水經此入于江相近有大小石門山自瑞昌縣愁山發脈二山對聳中間相去百餘步山下有石如屏四面相對俗云大小城門

靖居山在府城西南六十里相傳昔有傅姓者於此射鹿墮胎而斃遂折弓矢修道因名山曰靖居

株嶺山在府城西南山多怪石叢木相接者爲高良山距府城八十里高聳秀拔爲諸山最或云昔有高良氏居此

柴桑山在府城西南九十里面陽馬首桃花尖諸山皆是也

寰宇記云陶潛居此按靖節書院及墓皆在今面陽山之陰

博陽山在德安縣南十二里漢地志豫章郡歷陵縣南有博陽山古文以爲敷淺原宋儒蔡沈書傳謂山甚庫小未見其爲在所表見者明夏允彝禹貢合注云博陽在廬阜西南謂敷淺原之陽也

義豐山在德安縣西一里昔義門陳氏有良田在此屢值豐稔因名或云邑人好義聚居如陳王梅鄭多至千口茲山之應也

烏石山在德安縣北十里旁有石高十丈餘名獅子巖東北自廬山來盡於東崖西北自東佳山來盡於西崖相對如門又名烏石門其中平疇曠野東西北三河皆滌匯於前

一里許從石門流出又其間有大道道旁石竅流泉甚清甘此山相傳神禹治水所開今兩岸若有疏鑿痕相近有孤山山勢孤特昔人有環圍多秀麗安得與同栖之句望夫山在德安縣西北二十里方輿記云昔人行役未回其妻登山而望今石上雙跡顯然下有余家泉歲旱取水禱雨又西北十里有寶山舊出錫鉛

葛洪山在德安縣北四十里世傳葛仙翁曾遊此有晉石泉碑載仙翁除蛭事洪陽上鄉有鼓鳴山宋祝仙昇天處亦有碑

使君山在德安縣西北四十里唐李渤爲江州刺史置書院於此舊志譌爲史君又有石鼓山天陰輒聞鼓聲又大塘山山塢有塘約數十畝足資灌溉又西北爲秦山界德化

瑞昌間上有金盆泉溉三縣田數百頃

東佳山在德安縣西北八十里其下有紫巖泉可灌田五十頃又西北二十里為櫻桃山

崑崙山在德安縣西北一百二十里山前有東西二湖上有王喬禮斗臺元陽觀後有牡丹一本色如丹砂傳為王仙手植明周在遊記云崑崙石山也其勢無層峰疊翠遙望如長城逼漢然山戴土厥土惟烏極膏腴物產甚豐山麓有桃大泉由泉十餘折約三里許至山巔可與相並者惟東佳櫻桃羊腸馬脊數山而已觀後有磐石可坐百人東行里許有巨石名流涕石雖烈日暴爍石不減潤

石沃山在瑞昌縣北二十五里赤湖中其水沃潤因名又湖中有青竹山上多產竹

榜山在瑞昌縣南五里形如挂榜縣南四十里有角里山相傳漢角里先生嘗遊此

白龍山在瑞昌縣西十里白龍泉水遶流山麓

蘇山在瑞昌縣西北三十里相傳蘇耽沖舉於此又西北為馬脊山對峙者為羊腸山皆以形似而名宋何英詩羊腸有路地多險馬脊無人天一隅

愁山在瑞昌縣西六十里嵯峨陡峻行者愁焉

書堂山在瑞昌縣西七十里傳為王喬讀書處山有石房石壁上有朱墨跡相近為清溢山縣亘三十里高出羣山乃溢水發源處有淵如盆冬夏不竭產菱芡甚美

赤顏山在瑞昌縣西北百二十里舊傳赤松子遊此

石鐘山在湖口縣有二上鐘山在縣南下鐘山在縣北酈道

元謂下臨深潭微風鼓浪水石相搏聲如洪鐘宋蘇軾明  
羅洪先李齡皆有記正統十四年蘇記石刻仆於水上鐘  
山之景凡十一曰上鐘巖鐘石小五老峰石石屏石几龍  
首石昇石獅子石倒石石筍上鐘石洞下鐘山之景凡十  
五曰下鐘巖鐘石柳石觀瀾石滿冠磯石友石雲窩碎石  
灣樂德舍下鐘石洞魯般洞濟巖洞白雲洞懸巖洞竹洞  
詩文甚多見鐘山集

幞頭山在湖口縣南與上鐘山相連峰巒秀拔狀若幞頭

鐵屏山在湖口縣學宮前橫亘百步臨江澚

大嶺山在湖口縣東二里爲附郭諸山之高者縣南二里有

小嶺山其峰險峭過於大嶺

旂山在湖口縣西南三里許相傳明太祖與陳友諒鄱陽鏖

戰忽見山巔衣黃者麾旗而友諒浮橋頓解在旂山後者

爲松壽山以古松得名今已凋盡

柘磯山在湖口縣北四里即沙山其峰峻沙擁之迤東相連

者爲老臺山縣北二十里有西山相連者爲香爐墩山縣

東北三十里有龍潭山

東石山在湖口縣南三十里旁有龍井上多雲氣又南四十

里爲浮山在皂湖口形若龜浮水面

酌山在湖口縣東二十五里或云上有醴泉又東十五里爲

花尖山分大小二尖峰峰如芙蓉又有黃嶺山以山土黃

色故名

武山在湖口縣東五十里與廬山夾鄱湖而峙根盤四十餘

里爲西南最高之山上有茨菇池池畔有寶華寺相傳赤

脚僧修煉於此界接彭澤縣

曉石山在彭澤縣東一里環山皆蜿蜒而此峰獨秀拔日出先有光縣北一里有觀音山相傳元至正元年四月八日雪集巖前現大士像因建堂山中山有白龍洞其石肖龍縣西有鳳凰山山下有讀書巖右爲潛玉洞

龍山在彭澤縣東南三十里梁尉文光修煉之地松壇石室丹竈遺蹟具存

石壁山在彭澤縣南四十里山有玉壺洞高七丈深三十丈泉流不竭一名仙人巖宋時縣僚祈雨有客題一絕句人疑爲仙事見豫章詩話其下爲青山湖

遊龍山在彭澤縣南新興鄉東接浩山延袤百里山北爲大鳴山衆石崔嵬羣木蒼鬱四時澗水注石有聲如雷相峙

者爲小鳴山

仙跡山在彭澤縣東四十里上有巨人跡相近有陶王山上立陶侃廟

黃漿山在彭澤縣東南四十五里疊石如甃上下有二洞深邃莫極歲旱祈雨輒應宋黃鵬舉詩清泉澈底瑩無泥喚作黃漿恐未宜若見洞仙還寄語佳名當喚碧琉璃

馬當山在彭澤縣東北四十里其山象馬橫枕大江烈風撼浪行舟險阻人爲立廟其巔有天井相傳唐王勃舟過其下遇神賜以順風一夕至洪州作滕王閣序陸龜蒙銘云天下之險者在山曰太行在水曰呂梁合二險而爲一吾又聞乎馬當

浩山在彭澤縣東九十里界連鄱陽建德東流三縣唐李大



亮擇彭澤山之高者莫若此因浩山而立浩州後廢

小孤山在彭澤縣北壁立大江中一名髻山取其形似髻也

江側有彭浪磯與山對峙俗謠云彭郎為小姑壻廟像遂

婦飾而勅額為聖母明嘉靖間去封號題曰小孤之神按

宋陸游遊記云小孤洲即彭浪磯屬彭澤小孤山屬江南

宿松縣界

雙劍峰在府城南龍門西峰下有池一名小天池其峰形勢

插天宛如雙劍與府治正對宋乾道中蜀人唐立夫來知

江州闢譙樓前隙地築為二城夾樓而轟其上謂之匣劍

雙劍之西北有太乙宮傳是晉董奉道場

圭璧峰在雙劍峰西南峭直而偃首如圭與錦繡峰相並錦

繡峰蔥蒨如舒繡故名又西南為蓮花峰亦有董奉杏林

遺跡宋儒周元公卜居於此蓮花三峰之北有撥雲峰又

北為蛇岡嶺之首其下有雲溪寺

聖治峰在蓮花峰西南唐有陳隱君居此即義門陳氏之祖

也其南有仙人巖其東北為三山澗

香爐峰去府城西南三十里廬山之北峰形圓聳雲氣非常

其陰為白居易草堂故址又吳章山東有小山亦名香爐

峰蓋廬山本有三香爐峰也香爐峰西南為講經臺臺北

折而西有上中下化城三寺臺西為虎崖有中下二大林

寺寺枕大林峰而下大林側則為雲峰寺

天池峰在天池寺北其寺明嘉靖中僧明瑤重修佛殿覆以

鐵瓦天池在殿前仰而上出故云寺南有文殊巖西南有

舍利塔西有文殊臺其下邃谷夜有光出是為佛燈

鐵船峰在天池山西南峰頂有石船其色黑故曰鐵船或云  
吳許二仙之鐵船墮而為峰考集仙傳中無此說也又西  
南為白雲峰與黃龍阻一水

石耳峰在圓通寺東南其峰有二並列高聳形如兩耳宋洪  
芻詩猴溪橋下潺湲水惟有峰頭石耳聞寺有夜話亭歐  
陽修與僧居訥談道處也有一翁二季亭蘇洵與子軾轍  
往來寺中所謂一翁二季也

擲筆峰在大林寺北相傳晉慧遠製涅槃經疏成擲筆於此  
東南為長衝有泉數十泓石門澗水之源也

支提峰在黃龍寺東明末建六和塔於其上相接者為雲屏  
峰下有二池四時不竭

九奇峰在天池峰之陽東起含鄱嶺西迄上霄峰其奇者有

九故名俗謂之火焰山

麒麟峰在德安縣崑崙山上圓聳峻拔乃山脈盡處也

武峰在瑞昌縣安泰鄉與江北文峰對峙故名

丈人峰在湖口縣大孤山上明米萬鍾鐫題

鳳凰嶺在府城東五里俗名長嶺府城南十二里有曾家嶺

明天啓間里民黃學禮斃路

分水嶺在府城三山澗之西南其上有太平鋪又西南為松  
光嶺其嶺多石樹皆生石上有黑松林野燒不及蒼翠盤  
曲如畫西與牯牛嶺相接又西南為鈐岡嶺

馬迴嶺在德安縣北三十里明初破陳友諒後軍至此迴馬  
故名

石人嶺在瑞昌縣洪陽上鄉路通湖廣與國界

梧桐嶺在湖口縣東四十里嶺麓界彭澤通江南徽州  
石佛嶺一在彭澤縣南三里一在縣東五里又縣南八十里  
有鮑家嶺

七里岡在府城南五十里橫亘平行者七里故名府城西南  
九十里王弘岡晉刺史王弘遣白衣人送陶潛酒即此地  
也

石繡毬岡在瑞昌縣獅子山前又縣之金城鄉北隅有雞冠  
岡上有巨人并馬牛跡

龍蕩崖在廬山蓮花峰之水口有石如船其澗曰石船河佛  
手崖在天池寺東北距昇仙臺數百武石壁垂下如手故  
名崖內有一滴泉千佛崖在小天池寺前有楊岐洞相傳  
楊岐禪師卓錫于此

老君崖在廬山太平宮左太平宮者唐開元中所建九天使  
者廟也事詳李玘碑文

朗公巖在廬山化城寺僧慧朗宴坐處也龍王鉢孟錫杖三  
泉及觀燈石俱在寺側

白石巖在德安縣東佳山之巔高二十餘丈石色潔白

紫巖在德安縣東佳泉之上巖石峻聳如壁望之紫色瑩潤  
泉出其下天晴則西流雨則東流雨晴未定則西有小水  
遇旱人欲塞其實挽之於東亦不能也泉西有石洞深不  
可極旱則瑞昌建昌武寧諸邑之禱雨者畢至秉炬以入  
火滅即昏不知所出進四十里許有大湖昔求雨有善泗  
者過其湖見小山及田疇或擊桃符用狗首觸龍聞土雷  
之聲即得雨洞中勝槩不可殫述明嘉靖間知縣蔡元偉

西江志 卷十二  
作記表之

白霧巖在湖口縣王仙鄉四時有白霧飛障又有了髻巖亦在王仙鄉雙石秀拔如髻

白龍巖在彭澤縣南九十里巖壁有白石如龍

蓮花洞在府城南二十五里蓮花三峰之北舊志洞門高丈餘藤蘿交蔭晝日常黯水源不竭通新橋大河桑疏云今三峰之下無此洞也迤東有劉越洞巉壁倚天洞口約四尺深不可測相傳劉仙隱於此郡人王雲師有記

飛雲洞在太平宮後山俗呼詠真洞蓋假借詠真洞天而名之真仙通鑑云桂心淵人謂之桂風子隱居其間後尸解去心淵係元延祐間人見元學士李洄遊廬山記

白鶴洞在府城西株嶺山下門高二丈許深遠無際中有泉

水四時不竭灌田百頃相傳白鶴仙人於此修道

清源洞在府城西九十餘里德化縣之南昌鄉洞門高丈許內深如屋水源可灌田百頃

柵嶺洞在德安縣北四十里柵嶺山之巔洞門高八尺中廣丈餘上有一竅四時滴水有小洞可深入

玉華洞在瑞昌縣東二十五里泉湧如雷唐時僧於洞中獲磬與錢皆漢代物也宋趙汝馭詩唐僧逢漢寶山洞得仙名志勝云德安亦有洞名玉華與之相通

王喬洞在瑞昌縣歸義鄉內有懸旌滴泉天窩石鐘諸勝傳是王喬修煉處又烏岡山萊子洞相傳老萊子隱此皆無可徵信也

垂魚洞在彭澤縣西南五十里深遠莫窮有石魚垂於洞內

又有石橋碁局石乳之異

謚告石在府城濂溪書堂宋嘉定間魏了翁請為先生易名  
詔謚曰元後了翁召還過九江以謚告寶慶間軍守趙善  
璪始鐫之石

影石在西林寺高八寸徑五寸梁太清中有僧自西域持來  
佛象頂上常放異光道俗瞻仰咸指為幽冥鏡云隋時晉  
王廣取去後登儲貳乃送藏曲池日嚴寺雞公石在雞石  
山上山椒有石如雞其味加於蓮花峰之巔

龜紋石在湖口縣北石紋山旁

寶珠石在彭澤縣發洪嶺內大石分裂斜枕溪畔中有圓竅  
八九左右徑圍相符俗傳神人劈石以取寶

潯陽江在府城西北洞庭九水合流至此遶府城而下四十

里又合彭蠡湖水東流入海潯陽記云九江之名一曰烏  
江二曰蚌江三曰烏白江四曰嘉靡江五曰畎江六曰源  
江七曰廩江八曰提江九曰筩江朱子謂禹貢九江在荆  
州域與今之府境無涉故但志潯陽而不列九江  
禁江在湖口縣上通大江下接小孤至冬水涸成池乃魚鰕  
所聚之處

龍開河在府城西里許源發瑞昌縣清湓鄉東流入大江約  
一百五十里世傳古有龍開之因以為名

廬山河在德安縣治東北自廬山烏龍潭發源西南流至烏  
石門與東北二河合

黃媪河在德安縣北源出高良鐵爐沖流經黃媪坂至烏石  
門與東西二河合

金帶河在德安縣西豹子巖發源流經縣西南與東北二水合四面遶旋如帶後以山溪暴漲於縣西義豐門外百餘步衝決與箬山河合而縣西之水遂湮明嘉靖間知縣蔡元偉議開未果箬山河在縣西北迎恩門外

沙頭河在湖口縣沙頭港口沙洲漁唱為八景之一今名麒麟河

甘棠湖在府城南一名景星湖唐刺史李渤徑湖心為隄長七百步以利行旅後人懷其德因名其湖曰甘棠

鶴問湖在府城西十五里世傳晉陶侃擇地葬母至此遇異人云前有牛眠處可葬已而化鶴飛去

官湖在府城西三十里臨大江春夏之交江水泛漲芟葦合生不容舟楫其湖產魚舊設河泊所于旁

芳蘭湖在府城東二十里發源廬山澗水東流入彭蠡湖水漲湖光激灩水退則一溝泓靜岸草如蘭明少參黃堯彩隱此結廬其上

柘港湖在府城北十五里水漲為湖其地宜柘又府城北四十里有江磯湖

宮亭湖在府城東南九十里已見南康府

赤湖在瑞昌縣東北二十里周遭約百餘里縣北四十里有下巢湖其水無源江漲則溢落則涸又金城鄉有白馬湖彭蠡湖在湖口縣治南水之西南流者皆注之由縣南入大江詳見水利志

陪湖在湖口縣東南八里距縣東四十里有阜湖自劉家市橋而來入彭蠡湖有巨石其色類鐵隔山合派者為白洋

湖與阜湖支流聯絡者為土目湖地界都昌縣

牛脚湖在湖口縣北十里又名牛橋湖通大江

母鯉湖在彭澤縣南十餘里元李時冬月於此得魚愈母病

又南五里為方湖周迴五十里許

大泊湖在彭澤縣東北三十五里通江南東流縣香口鎮

博陽川在德安縣南春夏秋則水瀾漫通四方往來賈舶冬

涸僅容小艇

虎溪在東林寺前相傳慧遠送客過此虎輒鳴吼

灤溪一名南河在瑞昌縣南五十步唐元結嘗居此有詩曰

尤愛一溪水而能成灤名

湓浦港在府城西里許西通龍開河北通大江淵深莫測民

居兩岸可泊舟楫源發瑞昌縣清湓鄉相傳昔有人洗銅

盆水忽暴漲失盆投水取之見一龍銜盆奪之而出故名

盆水浦口有亭唐白居易聽商婦彈琵琶即是處也

濂溪港在府城南十五里自廬山西北流合龍開河入江宋

儒周元公寓此因取其故里之號名之

女兒港在府城東發源廬山北流二十五里入彭蠡湖水漲

可容舟百餘因大孤山峙其前俗譌作姑遂以名港

將軍套港在南湖背明初於此作浮梁以渡師或曰樹柵以

遏奔衝者今柵木為沙所壅猶見其杪云

小港在府城西南七里一名官牌夾濱江可泊舟

金城港在瑞昌縣羅城山下其水西流

楊港在湖口縣北二里許山勢開豁可泊巨艘明萬曆間設

權關改名武曲港今仍之詳見水利志

西江志 卷十二  
椒樹坂港在湖口縣東北十五里

膳脂港在彭澤縣治北遇江水漲北注入港可容舟楫

安樂港在彭澤縣西南三十里又縣南四十里有大港

山林港在彭澤縣東三十里源出黎坑嶺支流入大泊湖又

筲箕港在潦洪口源出武山瀉油嶺讓子港在太平鄉自

浩山出北經東流縣香口河入江其水泛灤而清深

烏龍潭凡三在牯牛嶺北邃谷中中兩潭皆高數百丈有蟲

如鮎而黑長三四寸曰龍師下潭稍平夷其旁有大石曰

拜石東林寺祭龍之所

白龍潭在廬山天池寺南嘗有白龍變化禱之即應

龍聚潭在湖口縣柘磯港口可泊舟

清水潭在彭澤縣西四十里水清多魚古樓潭在建安鄉潭

### 深莫測

射蛟浦在湖口縣西南十里一名黃牛湫昔漢武帝自潯陽

浮江親射蛟江中獲之疑即此地

黃家泊在湖口縣東六十里一名黃茅潭村民百家行舟可  
以棲泊

磨刀澗在府城東三里許通白水湖其石可利刃故名

石門澗在府城南四十里廬山長衝之水屈曲流注景最奇

石岸如門前二後一北山精舍宅其中周景式廬山記云

水道雙石之中懸流飛澗近三百步許望之若曳飛練於

霄漢中明畢成珪復有遊記

庾樓磯在府治後城外臨江晉庾亮始構樓其上歷代數有

興壞明正德間知府李從立修之嘉靖十一年知府馬紀



命工甃石表亘里許江城恃以爲固今復崩圯府城東北里許有迴龍磯舊名小獅坡鎖江樓建其處有塔作文峰迴風磯在府城東北四十里舟行至此俱轉蓬避風

老鴉磯在湖口縣南五里明萬曆間改名鳳凰磯茭石磯一名龍王磯在茭石鎮巡司舊址有山爲寓戶掘石燒灰以致崩塌

峰山磯在彭澤縣西南三里上有巡檢司縣西有鍾子磯其石尖銳與鐵爐山排立江濱

金沙洲在府城女兒港東北白沙水積初日照之燦如黃金明太祖與陳友諒戰鄱湖檣舟洲下友諒有術士能嘯風揚沙風忽轉友諒一軍盡昧明師殲之洲上封郭洲在府城江北有隄縣亘數十里詳見水利志

桑落洲在府城東北過江五十里昔江水泛漲流一桑於此因名唐胡份詩莫問桑田事今看桑落洲數家新住處昔日大江流

營盤洲在瑞昌縣螺石口平地五墩相傳明太祖追僞陳時所築

梅家洲在湖口縣治對岸其旁有馱鷺洲得勝洲在彭澤縣西明太祖戰陳友諒始捷於此故名洲尾有新洲成化間湧出者

毛葫洲在彭澤縣北元末繆將軍領毛葫蘆軍駐舟於此縣北又有雁來洲水涸朔鴻羣集

楊葉洲一名柳洲洲以西屬彭澤東屬江南池州邑人丁湛有記

蓮花池在府學前廣五畝明知府蘇致中開濬種蓮  
國朝康熙壬子知府江殷道復濬之蒔蓮益茂

白家池在府治西唐白居易鑿以養魚種荷有已被山中客  
呼作白家池之句治南有鄂王池相傳宋岳飛節鎮江州  
時所鑿今湮

白蓮池在東林寺晉慧遠鑿因結白蓮社宋李公麟曾作蓮  
社十八賢圖寶石池在太平宮內唐開元間賜名異石晶  
熒夜發光彩後為亂兵所焚石死池亦荒翳僅存

道源池在德化縣學前明嘉靖年間鑿

聖池在湖口縣東嶽廟前因祈雨有感而名

九曲池在湖口縣南三十里彭澤鄉相傳晉陶潛所鑿今成  
小港

虎跑泉在東林寺後山舍利院塔左慧遠與社賢遊上方塔  
患水遠有虎跑石出泉水壺泉在東林寺殿後又有卓錫  
泉及聰明泉陳舜俞廬山記云遠公與殷仲堪論道殷才  
辯縱橫遠指流泉謂曰君侯聰明若斯泉矣又西林寺香  
谷內有香谷泉

神泉在蓮花峰後宋紹興間皇甫坦隱廬山斲地泉涌

沒泉在含鄱嶺下泉東北流入於月山南之大溪

豹子巖泉在德安縣西南十里又縣東北二十里有硤石泉  
在硤石嶺下遇旱灌禾收倍常年吳山泉在縣西北四十  
里吳山下灌田五百餘畝其泉當春雷震乃流出冬月雷  
伏即涸若巖冬聞雷鳴其泉亦涌出也縣西北七十里有  
靜泉平地流出寂然無聲灌田三百餘畝

布金泉在德安縣崑崙山之陰自平地湧出蔭注德瑞二邑  
田數百頃

白龍泉在瑞昌縣西二十里泉出巖洞有潮信之異昔李成  
寇境白龍顯應泉霧四起賊不敢近宋慶元六年賜顯濟  
廟勅特封其神為孚澤侯

大堰泉在瑞昌縣甘露鄉平地涌出四時不竭溉田百餘頃  
其水流入赤湖蘆泉在清湓鄉泉與江通時有敗蘆漂出  
溫泉在金城鄉其水常溫又歸義鄉有魚泉當春雷震有  
小魚躍出色皆花居民候之取食又五龍泉出小石洞僅  
容一人入每水大涌則大雨小涌則小雨占旱澇甚驗南  
泉在涌泉山下冬溫夏寒溉田數百畝泉左有洞多奇石  
世傳龍潛應禱

冷水泉在湖口縣北二里樞頭下瑩如冰鑑味甘不竭治東  
有飛錫泉唐僧道簡遺蹟後寺改儒學名三汲泉

函玉泉在彭澤縣山川壇左自山頂石罅中出四時清瑩人  
多掬飲以愈疾上有古刻函玉泉三字又名冷水澗

赤泉在彭澤縣南一百里泉赤色利灌溉

浪井在府治內世傳漢灌嬰穿此井湓江有風井水輒動李  
白詩浪動灌嬰水潯陽江上風乃紀實也

龍淵井在德化縣學明倫堂東其泉清冽不竭又無垢寺前  
有井味甘色白即以無垢命名

飲井在瑞昌縣金城鄉泉出平地深不可測灌田數頃

懈口井在湖口縣治內相傳郭璞以地形似懈掘井以為懈  
口又有懈眼井二在治左右又孝感井在孝感坊舊志云

昔有孝子母病渴時值旱枯孝子暮夜撫井而泣至曉泉迸出奉母飲之疾遂愈因以名坊

煖水井在彭澤縣橫山湖東四時流泉温煖可掬  
木橫井在彭澤縣南六十里深廣各丈餘灌田百畝

西江志卷第十二

西江志卷第十三

山川七

南安府

玉枕山在府城北五里為南安之主山高三百仞兩麓五峰次第相屬別名五指山宋周元公敦頤嘗遊焉明成化中新會陳獻章應聘歸道經此與知府張弼酬和有玉枕詩話

印山在府治南里許驛使門內舊志有七丘名七星此其一也周遭為池山峙其中如印故名

東山在府治東南二里舊有仙翁菴今為真覺寺小河橫繞山下大河西來相會若縈帶然從寺俯矚兩城形如合璧也南康縣東五里亦有東山

獅子山在府城東一里如獅蹲踞有清惠泉相傳可以愈疾  
泉右有龍母祠稍南有大山形最端嚴

寶珠山在府西寶豐門外連五馬山而近城形圓如珠

五馬山在府城西四里水北岸形如五馬圓秀瞰江又上猶  
縣南門隔水亦有五馬山

五里山在府城南五里山之西有折梅亭蒸髦亭今廢

金蓮山在府治北三里諸峰連接狀若蓮花舊志山麓有法  
華院墨花亭稍上爲舞劍臺張弼改名高明所張詡詩金  
蓮山下高明所燕坐居然見八荒府城西北七里有龍頸  
山水自石出名曰龍泉山之半石砥如湍。

太平山在府城東北十里由下峒入山上有圓坪如涌盤旁  
有兩山如龜蛇因立真武廟上有泉出石隙瀑流數尋下

爲龍湫水中一墩自廟視之如浮杯然

西華山在府城西十里石壁如削轉磴而上平行有田有僧  
院宋崇寧中建後尋圯院前有石澗無魚鰕傳是神龍所  
遊澗旁一石甚平名釣月臺澗底有卧僧遺跡瀑布凡三  
十餘丈南有石洞可坐十餘人左有松數千株皆直幹無  
旁枝又老樹五自地摩空亦無枝蔓張弼與黎民表陳健  
等倡和有參差樹影青雲上遠近泉聲白石間之句  
天馬山在府城南三十里梅嶺之東又東有貴人峰

雙秀山在府城東北二十里舊名丫山宋知軍黃鐸改今名  
兩峰尖削如馬耳山有巨人跡宋棲真尊者塔西北有靈  
巖院右折爲柳坑有龍湫禱雨屢應明湛若水有詩

大龍山在府城北三十里舊志云延亘三里狀如游龍故名

左有幞頭巖右折有呆婆巖後有錫坑山又有仙女梳妝  
二巖相傳有仙姥挾二玉女棲此

玉泉山在府城東北五十里兩山峙立如門入徑二里許有  
泉有菴相傳蘇耽所居冬煖夏涼士人多於中誦讀

鎮龍山在府城西北六十里四山環列內有坪有溪右爲龍  
湫舊有龍見故名

天竺山在府城東北六十里山形率律林木豐茂與丫山對  
峙舊有寺今廢東有月峰奇秀特出相近爲巘山界接南  
康縣和溥水出焉又東北爲雲山自下陟上十里許有菴  
有靈應泉舊傳此山產桃遊人欲食者禱之乃許啖一二  
顆不得持歸

雲臺山在府城西南一百里由石溪村入山最高常有雲氣  
盤結盛夏涼沁遊人有衣裘者

南臺山在南康縣南五里山腰有巖可坐十餘人有南巖寺  
今廢月夜風籟過客時聞鐘磬聲稍右有山秀銳而差低  
名小南山縣西一里西山舊有古塔今存基址一層

鯉魚山在南康縣東北一里山形如魚又有髻山兩峰峙如  
雙髻縣東一里有東華山形家謂之水口山明萬曆間邑  
人王事聖創菴其上外甃石爲長堤前有平臺

九日山在南康縣北一里宋陳升之父魏公曾主縣簿夢山  
神來謁遂誕秀公因合九日二字名旭後避神宗諱改名  
升之登第後復宰是邑築臺其上名曰旭嶺書臺

獨秀山在南康縣東南二十五里舊名雞籠山峰巒聳銳下  
有龍湫禱雨屢驗宋蘇軾南遷過之改今名北歸賦詩云

獨秀江南知有意要三二別四方壺

高靈山在南康縣東南三十里山勢巍峻躡磴而上為三天門相距各里許門各磨崖鐫字最上有朝元閣瀑布泉折而左有塔院東數里有勝龍山北出九牛抵玉潭山為往來通徑山麓有菴曰盤龍晴日登眺風煙繚繞又東一山名青隱與贛縣武林山相望

龍山在南康縣西南四十里地名鍋坑高三百五十丈延袤四十里接大庾崇義界

雲主山在南康縣西南一百里高可數百丈形如飛驎山上有仙巖巖前有池四時澄澈旱澇無增減山麓有廟祀黃總管相傳神係唐代人捕賴坑賊遇害者

石君山在南康縣西南一百五十里三石形甚似人中最高

聳為君左曰夫人右曰女郎列峙如相顧然俗名薰嶺接大庾界

玉潭山在南康縣東北四十里地名潭口山濱大江章水流經南埜驛即自此潭東注相接者為鹿鳴山

禽山在南康縣西北六十里俗名蒙山高三百餘丈縣巨百里入上猶縣界

晝錦山在南康縣東北一百里初名大乘山山腰有寺曰晝錦故名即今妙聖寺是也

羊嶺山在南康縣北一百六十餘里山頂有浮屠相傳唐有郭禪師者居此下山或驅虎豹後以禱雨弗應積薪自焚火燃而雨隨至人見其烈焰中冉冉而去因祠祀之

蓮華山在南康縣北一百七十餘里又名巫橋嶺狀如蓮花

西江志 卷十三  
四  
上有巖可容百餘人巖前有仙橋橋下有瀑布千尺瀉於石竇不知所歸南唐時鄉人結寨於此因名蓮花寨嶺連崇義縣界又縣西北五里別有蓮花山

飛鳳山在上猶縣西北二里爲縣主山高百餘丈軒舉如飛鳳下有萬年觀巢道人居焉

資壽山在上猶縣東半里許高八十餘丈橫亘五里蹲踞如象南山在縣南二里高聳插霄俗有山生角地生鱗舉子成之讖明永樂中知縣吳謙建塔其上

巽山在上猶縣東一里相傳邑人有登科者則山下石障必生光彩又東一里爲方山形如覆斗一名石臺

西雲山在上猶縣東南十五里元至元間建普照寺旁有龍井明天啓間知縣龍文光旱禱至井得小蛇納之瓮中載

以入城未至而雨隨注乃以銀鈴繫蛇項還之井後邑人常見之因名其井曰靈應龍潭

九龍山在上猶縣西二十五里山有九尖峰又西五里爲琴龍山地名琴江下有龍潭遇旱於此祈禱

焦龍山在上猶縣西八十里兩峰對峙中瀉急湍有龍潭深不可測又西二十里爲書山形如書櫃一名太傅山並峙者爲舉嶺

崇山在崇義縣北半里許舊志名旗山一名斗山志勝云後以縣名易崇山縣東半里有大龍山高八十餘丈其麓爲笊籬山乃通十八面嶺之路縣西里許有伏虎山如虎飲河有泉流入城繞縣治學宮

觀音山在崇義縣南十里壁立峭絕宋紹興中有鍾行者登



山四顧戰慄莫能下因誦經若有白衣人掖之者故名龜山在崇義縣西三十里形如龜多產茶及水竹其竹節極疏而肉薄可為簫笛縣西南三十里有符水山一名浮竹坳產竹小而輕又西南十里為天臺山

大嶂山在崇義縣西五十里形如簾幙延袤數百里前臨絕岸跨以石棧廣盈丈隆數十丈

聶都山在崇義縣西南六十里高一百六十仞連亘四十里舊志云昔有聶姓者開都以聚民故名孫維嶽聶都問答云字從耳虛也從三耳虛之虛也是山盡石白質有文作金銀氣其穿在地肺拊之竅皆鳴若金革虛其至矣乎經稱都者不數見廬江出三天子都乃在斯流之下注是山也水出章合貢匯彭澤注揚子而入于海由海上溯危峻

若九關萬派頰首朝宗焉實惟帝之所都孫說特新錄之以備一解山下有獅子巖巖西有石田名斗田其上多礬石遠望如雪有石可為茶磨元有蒙古人宦此琢取過多又琢白石為礎五十雙載歸自此石變脆質此山本屬大庾平政鄉明正德間割屬崇義西接湖廣桂陽縣界

傀儡山在崇義縣西南七十里又西南二十里為南原山其高無極周迴約六十里飛瀑百餘丈下有湫潭其深莫測明成化間大庾令夏璣躬詣求雨有應勒碑紀事

箬頭山在崇義縣北一百四十里山峰聳出如聖箬然

九齡山在崇義縣西一百四十里石嶺龍從屏其後九十九峰峙其前

龍歸山在崇義縣西一百八十里與廣東韶州仁化縣連界

深林叢菁土人製茶與普兒茶相似

天柱峰在府城東北五里峰銳而圓參天如柱楊筠松云峰在良方居人多壽

齊雲峰在上猶縣西十五里勢干雲霄宋謝允昌讀書於此縣西一百五十里有筆架峰縣東二十五里豐江村有雙秀峰縣東北五十里有白塔峰亦名白塔嶺

文塔峰距崇義縣三里許當橫水之去口明萬曆戊申知縣楊邦直募眾建塔且作亭于上

國朝康熙庚申正月十六夜大風墜其塔頂是夜各處塔頂皆墜不獨南安屬縣然也

大庾嶺在府城西南二十五里漢志名臺嶺漢高帝時番君將梅鋗駐兵嶺下因名梅嶺武帝時庾勝築城于此又名

庾嶺為五嶺之一其山延袤二百里螺轉九磴而至頂登者難之唐開元中詔內供奉張九齡鑿開新路始通車馬九齡為文記之嶺分南北是曰梅關亦名橫浦關上有曲江祠宋淳熙間知軍管銳多植梅以實其名趙孟適以嶺下官驛皆梅扁曰梅花國明成化己亥知府張弼重修嶺路并作均利記勒之于石

小梅嶺在庾嶺稍西北實與庾嶺聯絡唐開元以前入粵之路由此故又名小梅關

金星嶺在府治東一里許水口寺左明隆慶間建塔于上又東一里為惜母嶺嶺下有惜母村

獅頭嶺在府城西南五里左有一山如象與此嶺俱瞰江流循江岸行有石竇頗方廣兩人可並行名曰石門下有一

石名石門限

莊彭嶺在府城東南十里留地村周二里許接廣東保昌縣界又府城東北十里有駱駝嶺高聳連亘形肖駱駝

白鶴嶺在府城東十四里舊傳蔡仙隱此有白鶴來翔其麓有蔡仙井清冽不竭

雙童嶺在府城南三十里舊因三峰圓秀命曰三將軍明成化間知府鄧應仁以中峰平似書案改今名

馬嶺在南康縣水南稍東一里延亘橫峙其頂頗寬平形家謂宜於馬首增築聳拔明嘉靖間副使高世彥檄縣傭工

累土勢稍昂起萬曆戊午知縣湯有望建塔于巔嶺嶺在南康縣西南五十里龍回村四面峭險攢石磊砢踰嶺屬信豐界

騰龍嶺在上猶縣治北舊學宮後原名龍歸坑明知府張弼改今名縣東北二十五里有馬跡嶺

大雷嶺在上猶縣北一百四十里地名大雷隘

紅桃嶺在崇義縣東南六十里接南康縣界

雙鶴嶺在崇義縣聶都山右志勝云即雙鶴洞舊名石室洞有井正員廣尺而深不可測相傳神龍居之昔有遊人溷

此井龍化雙鶴飛去洞容百人石乳凝結上如列星下如鐘鼓擊之有聲別有泉名觀音池縣西北一百七十里

金雞嶺

月子岡在府城東五里形如半月下有月子塘城北一里鐵岡舊有鐵冶又有五龜岡五阜相並偃伏如龜

青龍岡在府城東北四十里舊傳有青龍見故名太平寰宇

西江志 卷十三  
記云有陳蕃子孫墓郡國志云庾嶺有青龍岡徐道覆欲上大電繞身震雷而止山上有石時放光明號鏡石天心巖在南康縣西北四十里巖內通敞有光可坐數十人又以形似獅名獅子巖

梅福仙巖在上猶縣北猶石嶂中相傳有三仙女居此屢著靈異唐時勅封明萬曆初邑人因巖建寺祈嗣皆應巖中泉水甘潔拭目倍明

燕子巖在崇義縣聶都山左白燕羣巢其頂泥落爲乳皆成玉故名石如蓮瓣有盤盛之亦名蓮華巖內有丹田數百丘多作角弓狀

歐公峒在府城西十里舊志云山隈石澗多菖蒲間有一寸十二節者有卧石上若竅爲槽者俗名劍匣有巨石中斷

### 俗名試劍石

羅漢峒在府城西舊鬱林鎮峒有崖石如門中有石十八排列左右若羅漢然清泉滴注者凡六頂有石梁長丈餘危峻不可度

盧王峒在上猶縣西一百二十里山水雄壯以唐末盧光稠得名

桶岡洞在崇義縣西北一百二十里初爲峯洞虔撫王守仁搗其巢因刻茶寮碑記于石碑凡八行一百八十三字大四寸許離碑刻七八里鎖匙龍之地有水自上而下注于石穴深潭形若桶然此桶岡所由名也詳見劉凝遊記  
嫦娥嶂在府城南二十五里峰巒葳蕤秀開撒如帳幙舊傳葛洪煉丹其上遺丹液多產仙茅

西江志 卷十三 九  
猶石嶂在上猶縣北二十五里遠望如猶蹲近觀之形如石  
罈又名大猷山縣之得名以此後有月巖竅圓如月徑數  
丈有龍池歲旱應禱又縣西四十里有茶嶂

蜈蚣峽在上猶縣西四十里山峻峭而水深黑前有米洲宋  
李綱過此賦詩峽云食盡天下毒洲云散為天下食明推  
官韓統詩宋朝真相曾經過笑插青天霹靂手

鼓樓坳在上猶縣東南二十三里奇秀而高如樓閣故名縣  
北九十里有較車坳逕路迂曲如較車然

石壁在府治東一里又名赤壁長八十餘丈瀕章江為舟人  
牽挽之路明成化間知縣文志貴鑿平之以便行者

迴龍石在府城章江近南岸長數丈背弓起其下空虛如龍  
踴躍鯉魚石在府城雙壁峽口水中小稍落形如鯉魚洪

流新漲第見魚背高圓如籬俗又謂之籬石

浮石在南康縣西三十里高二十餘丈狀如覆鐘水環其外  
距浮石五里許有實石雄踞如虎高二十丈連亘五十餘  
丈因踞實岸名之以與浮對也

巾子石在南康縣北二百餘里高百餘丈橫亘四十五里其  
巔有巖可容五十餘人內有瀑布泉飛灑而下石形遠望  
如巾子故名俗譌為君子石

香爐石在上猶縣東二里形如香爐屹立水中

筍石在崇義縣西北一百五十里有大筍小筍雙石峙立大  
者高百丈小者差低

章江在府城南門外源出聶都東山流一百二十里過府治  
東折而南復折而北經南康縣以達贛縣或云出湖廣郴

州宜章界故名

湛口江在府城東南四十里源出留地坑會赤江東流五十里入章江水淺而清故名

池江在府城東六十里源出南康雲主山流合章江

芙蓉江在南康縣南門外章江水流至此澄泓渟深江之南有平沙橫衍數里皆民居從下行里許入東山徑有芙蓉港又東十里有芙蓉橋以唐時兩岸皆種芙蓉故名繞治南而東流折北凡一百二十里至贛縣會貢水

塘江在南康縣北四十里源自了髻蛤湖二水合流至長伯里匯為江頗泓深瀚漫折而東二十餘里入三江口經湖頭會貢水

上猶江在上猶縣南門外源出湖廣桂陽縣流過崇義界營

前彭山水入之繞縣前東流過南康界入章水或云彭山水即漢志所稱南壑彭水也

鼻吸河在府治西城外源出小溪入濠灌城中歲久淤塞腐穢居民多疾明知府張弼令歲一挑濬其記曰南安城狹而長如魚形然故曰魚城西城之下一穴達濠水灌城中屈曲如魚腸蓋魚之吸水通氣從鼻土人莫知其故譌曰碧溪河不知既曰溪則不可謂河也

大沙河在府城南十里源出關頭龍上合小水浦經東山麓入章江

平政水在府城西南五十里源出廣東仁化縣長嶺流經城南一名南江亦名橫浦

涼熱水在府城西北一百五十里其源一熱一涼熱水池圍

西江志 卷十三  
二丈餘深尺餘流四步合凉水東入章江太平寰宇記作良熱水謂熱水昔名豫水按猶豫義同豫水疑即猶江自唐避代宗諱而豫水之名隱矣

深坑水在府城南二十里源出梅嶺北流入大沙河即庾仲初所謂大庾嶠水北入豫章注於江者也

小沙水在府城西南二十五里源出鼓樓寨東流十里合大沙河

孤橋水在府城北二里源出北營泉竇南流二里經迎暘橋入章江

五羊灘水在府城東二里源出鬱村入江有石瀕岸舊云五仙騎羊過灘故名又東三里爲過步灘水水勢湍急中有巨山突出舟至此人輒登岸步過知府張弼鑿平之又有

樟槎水其源出于章坑東流爲大里水

靈巖水在府城北二十里源出丫山經雙牌舖合章江

密水在府城東三十里源出雲山南經小密橋合章江

大明水在府城西南六十里源出崇義傀儡山北流至大明村口故名

峒山水在府城北八十里下峒村源出黃公坑經石澗遶洞口之圓山南流出雲津橋入江又有湯瓶嶺下水亦南來與峒山水夾玉枕山脈下作學宮水流合章江

南埜水在南康縣西一名桃水舊志源出紅桃嶺合蓮塘水入章江

巽水在南康縣治東南一名西流水有二源一出大坳頭由合江口會龍坑水經馬嶺而西一出盧源坑由三角廟至

東嶽廟二水合而西流橫繞學宮之前又名六秀水  
大田水在南康縣西北四十里源出景泰陽山東流至南  
口入章江

禽水在南康縣西北源出禽山崇文里東流百五十里至南  
埜口入章江相近有過水源出過山東流會南埜水

蓮塘水在南康縣西八十里太平嶺下源出余原嶺之麓東  
流二百四十里經刀石湖至芙蓉江

河田水在南康縣西一百四十里源出至坪里鉛場派分爲  
二其一界茆坪桑灞注龜湖而出長龍其一出新溪逕長  
龍合爲至坪江又經太平里瑞陽江合於章水

封侯水在南康縣西南一百五十里源出布尾東流過校溪  
至石門灘入章江與貢水合相傳梅銷駐兵臺嶺兵衆嘗

營水濱後銷封臺侯故名

猶水在上猶縣東半里源出猶石嶂又縣東三里有造水出  
老寨背縣南六里有稍水源出石溪至稍口

料水在上猶縣西北三十里料村源出賴塘坑南流入章水  
縣西四十里有鬪水源出湖南益漿東南流合縣前江入  
章水

感坑水在上猶縣東南二十五里源出涼傘峰下有龍井旱  
禱屢應九十九曲水在縣東北四十里源出上坪水流九  
十九曲

石門水在上猶縣北一百里源出百丈峒東南入章水  
聶都山水在崇義縣西南九十里源出沙溪洞巨石方廣丈  
許厚半之五色如屏立滴水如鐘漏至洗心橋始大此即



西江志 卷十三  
章水之原而山海經水經所云贛水也詳見邑訓導劉凝  
遊沙溪洞記

帶圍水在崇義縣城北即橫水也源出大嶂山自西繞城北  
而會于東溪合上猶江入章水

麟潭水在崇義縣西一百里水竹坑口源出益漿昔有獸見  
潭上如麟因名麟潭東北入章水又縣西六十里有牛皮  
龍水東流入章水相近有義安水源出玉泉山

西符水在崇義縣東南五十里源出鑊山東流出南康縣南  
埜口入章水

南原水在崇義縣西南五十里出南原山東流經符江口入  
章水

潛水在崇義縣西一百三十里源出樟山洞流數里入坑復

噴出故有潛水之名殆濟水類也土人謂之鑽水

和溪在府城東北三十里源出巘山經和溪村合章水

蕉溪在南康縣西三十五里源出鍋坑流至浮石入章水蘇  
軾詩蕉溪閑試雨前茶指此

鴨子湖在南康縣南水中有堆圓如鴨子志勝云湖水漣漪  
丘阜突起湖旁有亭榭平疇周環多古松喬聳蒼翠

鎮前潭在上猶縣東一里自猶水分派成潭舊志云有巨木  
化爲龍遇旱踐以大牛脅以金鼓謂之攪潭水微動雨即  
至又東一里香爐石下有妹資潭一名妙姿以宋甘烈婦

得名邑人賴啓詩猶川月照江潭冷誰爲幽魂寫墨香

浸月池在府城內上有亭宋紹興己卯知軍趙衍建呂行已  
書額取宋莒公向晚舊灘多浸月之意

放生池在府城東二里宋天禧中置以祝壽自浮橋至石壁  
捕魚有禁知軍李大正揭亭其上扁曰好生錄事參軍趙  
彥初有記

壽龜池在南康縣治南街白鶴池在縣西今湮又縣東有石  
綠池宋開寶間偶出石綠尋竭而名不改

天池在上猶縣北三十里小梅嶺之南舊傳漢梅福煉丹處  
藥臼陷而成池

湛泉在府城東一里廣化院後泉有二左圓右方俱以石甃  
四時湛然不竭漱石微有聲宋政和間通判閔師文作湛  
若亭二淳熙戊戌知軍李大正改作湛泉亭自爲記州人  
繪李像築屋臨泉而祀之久廢明正德間里人張經復建  
亭其上劉節爲之記

上泉在府城東山寺先是山腰蒙川館後有泉前守鑿爲曲  
水僧舍在館之上往往從下取汲有僧性定者向衆云水  
可下不可上乎乃用符咒曰泉且上來與老僧洗盃其餘  
出山灌溉逾時僧廚之旁石竇出一水因名上泉又治西  
五里山下有正泉俗名滾水井里人用以溉田

卓錫泉在府城西南大庾嶺相傳唐僧慧能自黃梅受衣盃  
之曹溪五百僧追奪之至大庾嶺能以錫卓石泉隨涌清  
冷甘美衆駭而退泉之右有展衣坪盛盃石又有霹靂泉  
相傳宋時大旱僧致禱一夕大雷雨泉出于竇故名

涌水泉在府城西南四十里明永樂間居民忽見四山雲霧  
朦朧因往視之有泉涌出可灌田數十畝

甘泉在南康縣西南一里旱澇無增減味甚甘美

白雲泉在崇義縣西門外白雲山下清冽可瀹茗

龜泉井在府城西寶界寺內掘井及泉下有石龜泉從龜雙目中出宋張九成寓寺中品泉味亟稱之

魚目井有二一在府城西門內一在城西魚背岡府城形如魚二井為魚目雖旱不竭知府虞文詡立碑記

丹井在南康縣西仙臺觀井有二前後相對如呂字相傳宋建炎初呂仙寓此與鄧道士開二井自寫遺像并題詩

蘇步井在南康縣治東蘇步坊下井深水寒其出不窮

玉字井在南康縣東南隅其水清澈玉字街以此為一點蓋取象形之義

太陰井在上猶縣東南其水甘冽飲之可已瘴癘縣西北有同心井在宋義士李梓發同心里內

### 贛州府

賀蘭山在府治西北隅舊名文壁山即鬱孤臺是也唐李勉刺州時登臺北望慨然曰吾雖不及子牟心懸魏闕一也因以望闕名臺而北向宋州守趙時逢即臺麓之東北建書舍名一洞天後廢明正德丙子知府邢珣興復之弘治庚申知府何珖移建濂溪書院於其前崇禎庚辰虔撫王之良始遷縣學以書院為明倫堂

國朝康熙庚辰按察劉蔭樞構亭其上仍舊顏曰鬱孤臺建講堂尊經閣於山下左為宣明樓為清忠祠祀趙清獻抃文信國天祥其東為縣岡坡又東為龜岡昔建鳳皇臺臺畔為景鳳山其西北直趨府治尾蟠處二水合流章貢臺舊址在焉

筆峰山在府城東南隅濂溪書院後東接東勝山與夜光山  
所謂城內三山也

天竺山在府城西四里舊有修吉寺唐元和初僧韜光自錢  
塘天竺駐錫於此故名宋蘇軾李朴俱有詩今在東門外  
者非故址

伏龍山在府城貢水東林木陰翳城東十里有鳳凰山

玉房山在府城東南二十四里本名赤石山大石連聳燦若  
舒霞中有玉房瓊室天寶六載勅改今名

九峰山在府城西南三十里屹立高聳對崆峒而拱縣治

席帽山在府城南三十五里山下有黃仙石相傳一道人乘  
白鹿從石上凌雲而去

崆峒山在府城南六十里古名仁空山自南康縣蜿蜒而來

章貢二水夾以北馳蓋贛之望山也山麓周迴幾百里最  
高者為寶蓋峰面峰有寺明崇禎間太守劉寰榜曰空山  
精舍寺前為寶鏡池後枕玉屏幃其巔石類益孟宋李朴  
詩有地脈九支龍奮蟄天河一派練橫空之句

儲潭山在府城北二十里山俯清潭下有儲潭君廟唐刺史  
裴諝祈雨感應碑猶存

玉石山在府城北四十五里山俱黑壤惟片石鮮白如玉太  
平寰宇記云昔有瞿氏釣山下見二少年皎若冰玉相謂  
曰別來此石長殊駛已忽不見石上有冬桃樹及石杖云  
昔有引杖擊桃者去而留杖於此又北四十五里為錦屏  
山狀若屏張又東北十餘里為金龍山山接烏兜巖懸厓  
瀑布溪澗環流為入省之孔道

西華山在府城東北一百里上有真武殿扞自天寶六載勅  
曰靈山每月朔日雷火掃殿宇天雖晴亦間有雷電相近  
有金螺山舊傳掘土建刹得小石數斗如螺赤光如金故  
名上有石佛祈禱甚驗

合龍山在府城北一百里與天師山相接距山十里有龍蟠  
虎爪二石西接黃竹嶺為龍泉界

龔公山在府城北一百二十里志勝云隱士龔毫遯跡於此  
今為寶華寺馬祖道一遺跡及勒潭龍井在焉其東北為  
編蟲山西南為楊梅嶺天南山山舊有盧光稠驛亭又西  
為順山怪石萬狀歷三十六坳乃至頂接萬安縣界

黃唐山在府城北輿地志云中有石室石人每丙日輒聞簫  
鼓音蓋仙靈窟宅也南康記云山角有石子如彈圓或見

或隱府志云接萬安界割隸泰和縣

金雞山在雩都縣西三里有穴如石室相傳有金雞出入唐  
羅隱詩試向溪邊問漁父一宵還有幾聲啼

青釣山在雩都縣東十五里飛淙濺沫自巔而下春夏霖雨  
瀕江居民每候其聲以避昏墊

柴侯山在雩都縣東南七十二里南康記云漢靈帝時有劉  
叔喬避地於此自題其墓曰柴侯之後山因得名

雩山在雩都縣北三十五里高可摩霄山椒有泉歲旱禱雨  
於此邑之望山也宋淳熙中周必正為守禱雨而應立廟  
其麓嘉熙中必正之孫名頌者復令雩修廟而記之明邑  
人素淳有仰雩山歌又西北為太平山瀑布幽蘭供人遊  
賞今建太平宮觀于上

峽山在雩都縣西六十里兩山對峙袤亘十里貢水貫其中南康記云夜光遙見若火從峽泝流十里至蛟窟而沒唐天寶時勅改為夜光山山下有路今為通贛便道

左坑山在雩都縣西南七十里山下有龍湫禱雨靈應

固石山在雩都縣北一百里一名展誥山宋岳飛平彭友處又東北為御屏山宋時議立巡司今廢

高沙寶山在雩都縣東北一百里三峰品立宋時有樵者見白兔入穴掘之銀鑛溢出故名又東北五十里為禁山與張家山相連東望寧都西瞻興國南眺雩都昔人有禁曰彼此無相侵擾今仍其名又東北三十里為仔童山

南山在信豐縣西南里許與攬秀亭相望左枕花村右襟桃夢登麓遠眺可盡一邑之勝

縣山在信豐縣東三十里縣水出焉折而前有峰曰鳳皇石又東十里為小假山勢如列戟上有龍湫旱可禱雨又東十里為武山上有天池周環皆石雨後瀑奔澗溢輒有松子浮出多至盈斗舊傳唐武氏之族避地於此其麓為竹村舊志別載竹村山者誤

禾溪山在信豐縣東八十里怪石峭峻下有溪流蔭田可數千頃又東二十里為衢孚山麓有溫泉嚴冬不改北為河田山縣延數十里與安遠縣接壤安息水出焉

金鐘山在信豐縣南四十里上有二石筍一高數丈其前為羊馬石石磴數十級四周如墉中平如砥可容數十人又南為三明山三峰鼎峙石塔五層井泉激泓不竭舊傳王道人結菴於此明邑人俞慶築書堂自呼三明山人尚書

歐陽德司業景暘俱為之記

香山在信豐縣南七十餘里九十九峰有小溪十八道出龍湖口多產藥物志勝云昔人見百鶴翔集各止一峰一鶴無所止羣鶴復飛去巖有哀道人巖深廣可坐數十人道人賣藥市中夜則宿此一日忽去書萬山哀道人造巖住八字於石墨跡猶存又南為黃柏山有龍湫可禱雨又南二十里為聖山高插雲表石坪廣數十畝文如九宮八卦奇三偶四具見造化之巧又南二十里為龍平山俯瞰甃石灘上有照鏡石圓徑二丈許明淨瑩白

壺山在信豐縣南一百八十里有寺名大龍山舊志誤以寺名山頂有天池土人往往迎禱于此有巖數十多產紫草藥物嘗見異花開如白蓮相並一山差小為小壺峰又南

二十里為鳳湖山

穀山在信豐縣西三十里堆螺擁黛多產翠雲草九域志云山下地名穀田因以名山頂有池產五色鯉十道志云南康有五色鯉即此有廟祀晉九江太守蔡率今廢為寺寺南十五里有芙蓉巖距縣西南一百里有古株山

木公山在信豐縣西一百里上有天池廣數畝土人六月六日祈穀於此十人至池內可取十魚百人可取百魚如數則止不能多也又西二十里為猶山舊志云上分九十九面多產異藥

廩山在信豐縣北三十里豐崇如廩或曰唐改縣以此山得名明主簿李奉朝與賊戰歿於山頂即瘞而墓焉俗呼為主簿腦山與南康縣接界

龍新山在信豐縣北一百五十里一名青龍山普濟禪師卓錫之地塔今存其寺曰新龍舊志誤以名山

靈山在興國縣東十五里即南康之玉山爲宋趙清獻題詩處有象鼻石筍石鐘諸峰方竹徑芭蕉洞滴珠匹練二泉半壁一竇中石像趺坐俗謂飛來佛寺名龍華宋時鐵船僧自廬山來面壁於此明永樂初知縣唐子儀有重建靈山寺記相近者爲金斗山自趾達巔無寸土其斗絕者鐫石爲級以通行人有盧公巖舊傳盧禪學佛于此或曰盧公冠巖所嘗遊也泉仰出石上暑暍不涸背爲瀧石洞出紅石凡鑿石爲柱礎碑坊者需用焉。

方山在興國縣東北四十里方泰以此名鄉山頂出雲城中輒雨諺云方山戴笠滿街著履

上洛山在興國縣西南四十里西京雜記云上有石墨可書太平寰宇記云山中多木客乃魅類言貌似人能斫杉枋與人交易嘗就民間飲酒爲詩云酒盡君莫沽壺傾我當發城市多躡塵還山弄明月

崖石山在興國縣東八十五里絕壁萬仞縣亘數十里相傳文丞相天祥屯兵于此後有登者獲鏡與寶劍而歸又縣東一百四十里有蓮花山亦屬丞相駐兵處

覆笥山在興國縣北八十里雲牕私志云昔涓子發石笥得祕書十二卷因以爲名山高二十餘里東望金精西望芙蓉北接青原南瞰章貢爲一邑羣山之宗舊傳上有平湖周數十里湖中石雁每至秋天飛鳴應候又有古祠多靈草異物今皆荒蕪惟兩泉泓然紗帽峰馬鞍山諸勝錯落



於南厓間而已

大烏山在興國縣北一百三十里最高處有登天坊三仙殿皆東嚮吉水鄒元標顏曰重蜡報功山高二十餘里四更觀日出朱九疇隴三躍三按乃上昇石穴二名風洞雨洞深不可測北眺吉州城郭犁然在目又密石砦有山名小烏以景從大烏爲義

翠屏山在寧都縣東二里一名吳峰山勢蜿蟺界梅江而止下有長春谷宋邑人胡楚讀書處又東一里爲石華山松盤山頂如石之華上有仙子廬又東五里爲雲蓋山

武頭山在寧都縣東四十里脈發自閩盤亘數十里南康記云宋孝武大明中有至其巔者見池廣可百丈水色如丹旁有顆粒如珠光麗再往竟失其所山之支曰珠湖三峰

原名虎頭以避唐諱改今名

金精山在寧都縣西十里峰頭皆石望如陣雲爲邑西鎮山道家第三十五福地中有碧虛洞初入兩崖壁立中通一徑名一線天至望仙峰俯視城郭村落如綦布下臨洞口相傳吳芮所鑿舊志云漢張芒女麗英年十五入山得道長沙王吳芮聞而聘焉麗英弗許乃昇高紿曰山有石室中通洞天能鑿之當相見芮大發兵攻鑿旣通見女乘紫雲半空語曰吾爲金星之精降治此山言訖而去山以此名奇峰不可枚數其著名者凡十二曰蓮花合掌仙桃凌霄黃竹披髮望仙三巘伏虎翠微瑞竹石鼓詳見宋曾原一金精山記

果盒山在寧都縣西北十里四面皆崇山長松交蔽雲日中

通一徑周圍石欄俯視懸崖如在天際上有清虛觀明崇禎間周道人煉丹于此相近者為金牛山奇峰峭壁環繞二三里又有官人山唐季黃巢之亂官吏避兵于上東華山在寧都縣西北二十里飛瀑雷轟隔澗為甘泉巖又有暘挂山其頂曰天紫萊下繞桃溪山址皆田園村落日光反照掩映如畫因名暘挂又西北數里為桃林山徧山皆桃雜以佳卉茂竹有梵刹藏佛牙出舍利光其下有泉曰過夏遇僧解夏則涸右為龍湫能作雲雨

濛山在寧都縣北二十五里山間雲氣濛濛懸崖飛瀑頂有巖闊可丈餘前為戶牖石牀石梯不假斧鑿而成又一巖容百餘人其餘巖穴大小各極其妙相傳東晉時里人賴箕廬此元曾邨有記

團箕山在寧都縣南九十里界連瑞金石城二縣

中華山在寧都縣北九十里上有四季梅花結子至十月方熟下為陳御史勉故里

凌雲山在寧都縣北一百三十里高數百丈與大名山相連蜿蜒數十里左右石峰插峙下有龍湫其深叵測涓滴有聲曰衙鼓峒峒中有蟄龍投鐵觸之風雨立至相傳上有漢高帝祖墳故建漢高帝廟于山麓明董文僖越有詩辨其誣然疑為南漢劉氏之祖則龔之先世屬上蔡人與此地亦懸絕也

明山在會昌縣河北里許為邑主山巨石雄峙如屏嶂山坳有半山寺寒泉飛瀑冬夏不竭其麓有六祖寺下為五湖北折而西為西山巖宋尹天民讀書處

西江志 卷十三  
古方山在會昌縣東十里高壓羣山爲一邑之壯觀  
芙山在會昌縣北八十里秀色如天插芙蕖高四百五十丈  
周迴數十里

羊山在會昌縣西一百里舊傳有張十郎祠祀以活羊縱之  
不去虎亦不傷縣令余文震遷廟於仁峰其羊化爲石

紫雲山在會昌縣南一百里高數百仞鑿石磴四百餘級名  
雲梯石西折爲趙公巖又南二十里爲四望山東界閩南  
控粵清秀如畫距山十里有萬丈石壁立如屏

盤古山在會昌縣東南一百二十里周圍石壁亦號盤固山  
有羅漢巖容數十人池廣一畝產白蓮有寺曰智門相接  
者爲君山述異記云中有玉臺方廣數丈周迴盡白石覆  
如屋四面多松杉一名媧宮亦曰女姥石每風雨後聞鼓

吹聲山魃木客爲之唱舞

欣山在安遠縣南十五里太平寰宇記云凡十有二面高五  
百丈有石巖蓮池巨石如牀產異竹丹橘。

員華山在安遠縣西十五里孤聳員平有僧遊此得清泉易  
名源華

馬鞍山在安遠縣東南三十里相近有虎巖原名小池巖虎  
嘗藪此明季僧青山居之虎乃去又五里爲熊嶺

鐵山在安遠縣北六十里宋置鐵場今廢又北十里爲擢秀  
山有茂林飛瀑之勝又北十里爲罐石山在長河保萬仞  
崔巍峭壁如劃

國朝順治初年居民築砦以避寇又北十里爲巖陂山上坦  
下險東有石洞幽奇可翫又北五里許有香山其形似象

隔江一山如獅名獅象水口越二里即會昌界

陳石山在瑞金縣東五十里舊志分注水巖羅漢巖為三今考之乃一山也有巖深廣十餘丈由試劍石蠟燭峰而入統志云陳武帝微時嘗廬此故名羅漢巖以伏虎禪師著巖上懸石若龍有泉下注因石為簷雷下施柱礎曰六和精舍堂有水簾旁有玉峽滾球泉循巖折行有將臺點兵寨內有劍門九曲洞三層臺石竇石鼓石窻石梯外有天柱巔有龍湫

雲龍山在瑞金縣南五十里其山純石約高十里泉竇甚多遇旱不涸有南北二門最險鄉人避亂多構屋其上頂有寺曰應雷石壁有雷書篆字又縣南四十里有螺石山形如螺亦如伏龜如躍馬

銅鉢山在瑞金縣西北五十里相傳僧開山時掘地得一銅鉢山因此名高十五里雲氣常羃其頂下有龍井井中有石如龍爪禱雨見爪多應上有昭靈王祠凡八景曰騰雲石香爐峰筆子峰七星堆古龍塘金盤坳仙人湖及龍王井也

瑞雲山在瑞金縣北六十里即陳輦地中有瑞雲洞前後二門中分為兩高七八尺壁有竇燃炬可入莫窮所際水謁山在龍南縣南七里峙渥水中今名浮杯山

金盆山在龍南縣北二十里山南一池曰張天塘流注山頂四時不涸又南為龍山有龍湫又南為將軍山

上皇山在龍南縣南三十里有古菴曰上皇因以名山形華山在龍南縣東四十五里羣峰競秀迤邐為三仙山三

西江志 卷十三  
峰參列狀如筆架中間平曠隱若布局名三仙鬪弈蹊路峻仄若升梯然俗又呼梯子嶁又縣亘為七友嶁山勢層疊分而為七山下兩水夾流是為濂水

歸美山在龍南縣南一百里一名龜尾一名神闕高百餘丈有自然石城左右石峽如雙闕山產水晶果以與龍山對故謂之龍頭龜尾又南二十里為小武當山渥水出焉石筍九十有九列如矛戟飛鳥不能棲縣延為南宮三門角子諸山

冬桃山在龍南縣西南二百里上多桃樹經冬始熟下有溪流是為桃水冬桃隘在其上東抵廣東惠州和平縣南達廣東韶州翁源縣西距廣東南雄府始興縣志勝云踞險當關更番戍守可制三面

琉璃山在石城縣東五里舊傳秦末有劉華者家其上其女忽拾異果啖之得仙一名仙姑嶺

寶山在石城縣北三十里兩峰如圭又北三十里為樓蓋山舊傳楊真人煉丹之所有石几石牖午夜嘗見燈光或云許褒許國讀書于此又北十里為牙梳山北近廣昌東接福建寧化縣界有三十六面元延祐初蔡五九熊長腦據為巢穴山有鷹子岡琴水所自出也

三臺山在定南縣南隔溪三峰橫列中一峰特起下有印山縣東有文昌山高出城垣舊建亭曰仰高久廢明萬曆間知縣章瑩復之題曰山高水清縣西三里有西華山白雲山在定南縣東三十里其高百仞明隆慶初土人建菴掘地得石題曰白雲深處宋淳熙二年勒遂以名山

西江志 卷十三  
劉畚山在定南縣東北一百里與廣東龍川縣接界  
項山在長寧縣東南五十里閩廣之交有雙峰飛瀑之勝縣  
南五十里有盤龍山上有流泉古松十餘中藏梵刹  
寒地山在長寧縣東五十里林木蒼鬱紆迴二十餘里中有  
村落盛暑夜如深秋故名

帽山在長寧縣西七十里一名大帽嶂盤亘百餘里舊為葉  
寇巢穴稍南有鈴山高聳秀拔為黃鄉羣山之冠

官谿山在長寧縣北三十里棘箐叢深昔為盜藪至今天雨  
陰霾嘗有鬼物嘯呼

佛日峰在府城貢水東舊有塵外雲端駒巖一憩吸江五亭  
俱廢近復構塵外亭其下為馬祖巖相傳道一始欲棲此  
一夕鬼為築垣歎曰學道不至乃為邪鬼所測因棄去居

### 龔公山

丫髻峰在府城東南六十里又城南七十里有四會峰東距  
龍江與崆峒山相對其上方平容數百人旁有小徑可躋  
井源不竭宋元人每避兵於此相近有文秀峰突立平田  
中高百餘丈城北八十里有南高峰舊名吼嶺踞錦屏山  
之南高可十仞

秦娥峰在興國縣西四十里舊傳唐時秦娥自楚來虔得道  
能興雷雨一曰古孝女也土人祠之山腰為君子嶺

白茅峰在寧都縣西南三十里蓮花山左上生白茅下有龍  
潭四時嘗吐雲氣又有龜湖亢旱不竭縣南五十里有圭  
峰右臨梅水左瞰琴江兩石前垂如乳

東陽峰在寧都縣西北十五里高峻插天山腰橫闊二三里

西江志 卷一 三  
種植果樹有泉名仙液南唐時邑人衷愉結廬奉母隱此  
為靈巖觀舊志載有木鐘金精山木鶴鳴則鐘應之又縣  
北二十里有君子峰形如卓筆亦衷愉讀書處也  
仁峰在會昌縣西一百里舊傳有石室石臺祀張賴二神臺  
旁有竹一竿風來則偃而拂之其室故清淨無塵石竅中  
泉水不竭飲之可愈疾

東峰在安遠縣東二里峰巔尖秀如文筆

鷲峰在瑞金縣南五里宋建炎時劉十六郎兄弟從岳武穆  
破峒賊倡義于此六峰在縣西三十五里環拱若城郭巖  
壁玲瓏縣西北二十里有寶蓋峰相傳黑龍攪地成溪今  
濁溪是也又縣北五十里有齊雲峰

高陵峰在石城縣西三十五里重岡複嶂蜿蜒十數里與苦

### 竹嶺石門山相連

金圭嶺在府城西坊與獅姑桂家田螺百家為城中之五嶺  
城西五里有佛嶺舊名西隱山雙阜突起有亭介其間一  
曰御風一曰大觀今俱廢

文潭嶺在府城東三十里太平寰宇記一名昇仙峰巨石盤  
亘下有潭廣數十丈深不可測舊傳漁父於潭中得大小  
銅龍五今存其四又東十里為回軍嶺舊傳黃巢兵過里  
人方氏率眾却之又東五十里為馬頭嶺其上有石佛  
分水嶺在府城北一百二十里為贛縣萬安之界

慈果嶺在雩都縣南三十五里稍東逆折為堯塘三嶂又縣  
北三十里有長布心嶺山下地形長若匹練

嶠嶺在信豐縣西北四十里南康信豐於此分界巔有怪石

其上有巨人跡

蕭公嶺在興國縣東接厓石砦對峙者為豬嶺牛嶺密林叢  
箐路極險距三十里為胡公山陳謨詩所云前登胡公山  
似螳緣壁度也

梅嶺在寧都縣北一百三十里界連撫州建昌梅水發源之  
處環山有梅故名漢元鼎五年王溫舒征東越出此邑人  
丘成和作梅嶺考

桐嶺在會昌縣南五十里山徑稍平為閩廣通衢

打鼓嶺在安遠縣南十餘里頂有石鼓石槌鼓旁二石人對  
立邑譙樓鼓鳴輒應之後斷石人手乃已。

黃竹嶺在瑞金縣東北八十里路通福建汀州

程嶺在龍南縣東五十里界接定南又縣西北六十里有峰

門嶺其上山路如門

白水嶺在石城縣東北四十里又名東華山與福建寧化縣  
接界絕頂建二仙祠每歲雷入輒作數日腥臭又有遙嶺  
周迴皆石峽小峪出峪數里為巖前嶺

神仙嶺在定南縣北四十五里有仙人題字石漫滅不可辨  
識山巔石礎石盤行人或見火光煜然

登豆嶺在長寧縣北四十里又縣南五十里有丹竹嶺

雷岡在府城貢水東本名火燄山一夕為雷雨開通元參政  
全普安撒里建亭曰雷岡明成化間知縣何文縉正德間  
知府邢珣重修萬曆庚寅虔撫王敬明植松於上改名萬  
松亭又曰水雲深處距府城二里有社岡舊傳社日里人  
於岡上祀神會飲



鳳凰岡在府城北六十里宋治平間有雙鳳鳴于上  
九日岡在信豐縣西廂外二百步勢如覆釜平曠可坐百人  
為重九眺望之所縣西南六十里吉錢岡土色赭紫而圓  
若小錢之累疊

華林岡在瑞金縣西三里至七堡止約長十里許

馬蹏岡在長寧縣治南環繞西北其下有馬蹏江

通天巖在府城西二十里空洞如屋有穴透其巔怪石環列  
如屏宋祕書陽孝本隱此人呼玉巖翁有祠在焉東坡詩  
鐫石上其半壁曰忘歸巖明王文成有詩穿心龍虎翠微  
諸巖皆在其處

獅子巖在府城東北十餘里石壁峭拔高數丈深倍之遠望  
其狀類獅內有元代所建佛殿三間

羅田巖在零都縣南五里一名善山兩旁巖岫空洞交通宋  
嘉祐間周元公敦頤倅虔遊此賦詩縣令沈希顏因建濂  
溪閣明邑人何春更闢觀善巖王守仁為之說巖西有別  
一洞天其左曰仕學山房巖壁有岳飛文天祥題句縣東  
五里有靈泉巖瀕江立石水從石出味色絕佳一名出水  
巖

斗巖在零都縣南二十里前有小阜七因名頂有梁仙古檜  
又南二十里為需巖上下兩穴宋孝廉王鴻隱此又縣西  
南三十里有康石巖內五洞土人傳有飛仙舊跡縣西四  
十里有龍巖地名白雲嶂三洞嵌空玲瓏各可容百餘人  
石乳垂垂五色絢爛叩之鏗然作玉磬聲又若鼓聲溪流  
貫注出石龍口邑人素淳題曰洗心上曰白雲巖中曰太

西江志 卷十三  
虛巖下曰龍巖

鐵石巖在信豐縣南金鐘山志勝云巖有二門相對空洞窅豁舟行望之瑰詭層疊舊有鐵石打金鐘之謠又前為石井龍巖巖上有龍爪跡歲旱禱之鳴鼓則泉流涓涓鳴金則溢涌矣

三台巖在興國縣西里許三峰蜿蜒有放鶴看雲二亭故址頂有真武壇越里許為江東祠祠前古檜二株纓絡翔舞明初呂太常復兄弟與泰和陳謨為茅亭倡和府志稱榴岡翫翠亭水石淙然有聲並是其處詳見劉崧遊記

東龕巖在興國縣東北八里相傳為唐越國公鍾紹京讀書處巖前有試劍石中裂欲斷上有飛泉下垂如練兩旁壁立不可徑水流石罅間通小舟巖中可坐數十百入所謂

龕也面一峰奇峭如筍怪松異卉交其上一石如舫倚其旁巖水由靈湖來有巨鯉帶銅環云是紹京所養元提舉滕賓有東龕十景詩

雙龍巖在興國縣北二十里兩巖深廣可容數百人巖頂平敞處號仙人碁盤其旁竅可偃俛而出俗名通天巖

國朝康熙己丑知縣張尚瑗以巖對臘石砦諸峰大小三十六合于嵩陽之數改名對嵩巖縣西北四十餘里有定光巖泉出石上東南有小丘五六形如覆孟尚瑗以敦丘名之鐫字石壁邑人曾先慎有記

飛泉巖在寧都縣西北十五里邑人盧逵所名泉如匹練自山巔下注其上有集賢巖廣丈餘建有佛寺又數里至方竹巖多生方竹縣北百二十里有盧穆巖崛起千仞山腰

石戶如瓮廣袤十丈左壁一室持炬從竇入深廣半之頂有泉甚清冽相傳唐盧穆盧華於此仙去足跡猶存

蕭帝巖在會昌縣南一百里狀類獅伏而口仰張中虛可容百餘人有憑虛閣石關石倉諸勝相傳齊武帝避難處九域志云梁武帝微時讀書處南史云蕭蹟率部曲百餘人於此起義因名焉皆沿譌而未可盡信又南二十里爲漢仙巖去羊角水鎮二里舊名漢山峭峻拔雲下臨漢溪石竇僅可容人匍匐而入中有秦王讀書臺石龍數丈蜿蜒如真枯木一枝橫挂絕壁俗謂仙女燒香風雨不蝕中建圓寧菴樓臺參差依石高下泰和郭子章顏曰虎頭羊角之聚其勝景如鷹蹲僧帽蟾蜍諸石玉筍天竺二峰月鏡臺金剛窟滴水汜白龍激石隙泉石獅石龜笏碣仙人弈

處不可殫述南康記云可比閩之武夸非虛譽也

駐米巖在會昌縣東三十里深廣二丈許伏虎禪師駐錫處俗傳有小竇日出米隨多寡可給後人鑿之米遂絕今僅有泉流亦名注水巖

蓮花巖在安遠縣西三十里兩峰壁立中藏一洞旁有石龕二石塔一飛瀑從巖頂懸注入溪澗中

月圓巖在瑞金縣西四十里地名黃安巖深廣容百人志勝云巖狀如魚橫闊十餘丈前有二潭曰龍曰龜容光所射玲瓏清冷宋天聖中邑人鍾法明結廬其頂賜額月圓因名皇恩巖縣西北五十里有九仙巖地名密峽口深廣凡三里舊傳有九道人於此乘金龍去

玉石巖在龍南縣東北五里巖有三曰下巖上巖新巖舊有

玉跡寺以旁有巨人跡故名宋太宗賜書百二十卷依巖建閣藏之治平間賜額普和寺今廢明正德間虔撫王守仁征泃頭凱旋憩此題小篆曰陽明小洞天鐫碑于壁以紀功巖後一小竇曰鞠躬門知府邢珣所鑿列炬入有石形如狻猊經一線天有龍井以石投之作鐘鼓音由下巖歷上巖境皆幽冷新巖在南洞凡六七視二巖尤勝松林巖在龍南縣西南八十里寬曠可居中有石佛三雕刻如新凡旱澇疾病有禱輒應背有三峰卓立半壁開一圓竅相傳時平聞鼓樂聲將亂則聞鉦角聲

五龍巖在石城縣西五里西華山之麓志勝云唐貞觀中採樵者見五叟笑語巖中即之惟見五龍交戲潭中耳

通天巖在石城縣南十五里深若廣廈洞中一竅通天鳥道

盤曲而上頂方平若原石壁數十丈酷肖龍鱗有泉清濃釀酒較他水馥烈元至正末陳友諒餘黨踞此為砦又南二十五里為洪石巖狀如伏猊攀磴及頂入石門寬敞平豁舊有夾道長松今斬伐殆盡圓對寺辨嘯亭倚巔而立石泉一泓轉南為獅巖又十里許為滴水巖

青龍巖在長寧縣南三十里大小十餘穴清流縈抱佛閣凌空陟降必由棧道

黃石洞在信豐縣西南八十里高數十丈有石人作兜鍪按劍狀後有石獅象距左右又一洞深險人跡不能至懸厓飛瀑噴濺如珠

竹管峒在興國縣北八十里地名三陽磔叢篁萬頃三十餘里無雜植民舍皆以竹為之

青陽洞在寧都縣西北十里清溪泛溢循洞口入澄潭可鑑  
巖下建有佛殿上為騎龍岑鑿石磴懸梯而登結屋二三  
家洞底鐘鼓聲徹山頂

油瓶山巖洞距龍南縣南三十五里左鐘右鼓亦名鐘鼓巖  
隔江三石筍森立相向

青雲嶂在雩都縣東南七十里積翠浮空頂有梵宇縣西北  
十五里有古木嶂與烏石山夾溪而峙

九龍嶂在安遠縣南十五里上有龍潭者九旱歲應禱下有  
獅子石高百丈一石差小亦似獅相逐

龍鳳嶂在瑞金縣東三十里即龍霧山也諸峰相連若龍飛  
鳳舞上有仙女池旁有碁盤石傳是後周謝仙翁採樵得  
仙處縣西二十里有橫山嶂

烏石嶂在石城縣西五里巖石斗豎如屏凌晨雲罩至午方  
散縣南三十里有丈夫嶂頂曰仙桃巖石之類桃者頗多  
嶂之下為宋陳邦光舊宅又有夫人嶂以邦光妻魏氏得  
名

華竹嶂在定南縣東七十里與院逕山相接嶂下有水莫知  
其源山田悉資灌溉

鳳皇嶂在會昌縣東北四十里兩山夾峙如翼  
涼傘嶂在安遠縣北八十里聳入雲表接信豐界

雲蓋嶂在長寧縣東北十餘里雲氣羃歷四時不絕縣東南  
十里有蠟坑嶂峰如卓筆縣東六十里有馬戰嶂接福建  
武平縣界

寒信峽在雩都縣東北六十里與車頭嶂臨江對峙每歲峽

中先寒故名俗譌為韓信峽

余侯峽在會昌縣北一百里兩石夾峙江流迅激相傳有余侯得神龜於此無何龜亡侯亦卒葬峽旁土人立廟祀之縣南一百二十里有雁門峽夾江兩岸皆高山中列三石江水分為三道又號為三門峽舟行甚險

馬頭石在府城南三十里信豐江口水中共起如馬首

螺亭石在府城東七十里述異記云貧女採螺為業暮宿此亭為衆螺噉其肉死焉殯其旁冢化為石螺殼無數又東十里有噴龍石兩岸劍立飛淙注下為龍湫漢郡國志唐十道志及南康記皆云中有扁舸底人動之風雨立至晉咸康中始建祠宋紹興中賜額潛靈州守直閣陳韡禱雨而應奏請勅賜其神為廣潤侯勒碑紀績

國朝康熙丙子贛縣知縣曹炯旱禱得雨重新其廟榜曰霖雨蒼生

仙女石在府城北四十里上有仙女祠蠶者禱焉又北三十里有虎面石黑斑如虎文又北十里有石人石相傳宋州守劉彝舟過水涸灘高榜人甚難之夜夢石人語曰劉賢侯也吾當護之詰朝解纜即下灘

龍門石在雩都縣西南一里下匯澄潭夜有紫氣濛濛騰霄歲大比或聲裂如雷俗謂龍門開必有掇巍科者縣東南五里有羅石鄉人結寨避寇號羅石寨縣南十里有寬石高平直矗亦可避寇縣西十里有丈鼓石上建浮圖又距縣二十五里有鯉魚石瀕江色赤狀如游魚

響石在信豐縣南一百里石廣丈餘高數丈與人聲相答又

寧都縣虎溪中亦有響石能與溪流聲應如洪濤然

三峰石在信豐縣西南一百里三峰屹立如筍石戶北向舊傳戶內有二竇通於兩峰窅窾明曠緇流聚宿不戒於律一異人過而叱石石閉羣僧殲焉祇留一龕可容數人又巫山有黑松子石凡三十餘率高數十丈

羅經石在興國縣東簾幕嶂前石上隱然具子午篆文故里人多習形家言

虔化石在寧都縣西五里舊傳有虎化為石因字文相類更名虔化避唐諱也又西五里爲冠石由長庚橋西入環山麓皆植茶樹有一石上高下平若進賢冠又名紗帽峰南昌林時益結廬居焉所製林芥香味第一

螺石在寧都縣南十里秀峙梅江狀如螺旋對峙者爲雲石

巔廣百餘丈有天湖宋大明中人見蛟犀出沒焉

魚潭石在會昌縣南三十里石立江澚昔遺老周伯綸釣于此今潭淤塞又南八十里有雞鬪石兩石相距春水漲時舟行者多戒心相近有聖姑石瀕江如人形篙師過必擲石以卜吉凶

片雲石在安遠縣西六十里舊名版石高廣十餘丈版石堡緣以起名

貓頭石在瑞金縣西四十里三面俱險一面坦平避亂者構屋其上

天馬石在石城縣南十里小馬爭前大馬次之首尾鞍勒其石一一酷肖縣北有華蓋石狀若麾蓋一名錦繖石

贛江在府城北章貢二水之會處北流三百里至吉安府萬

西江志 卷十三  
安縣其間有險灘十八屬贛縣者凡九曰白澗天柱小湖  
鼈大湖狗脚銅盤錫洲梁灘

桃江在信豐縣東源出龍南冬桃山北流入縣界納黃田江  
東鄉江諸水流過烏漾灘入贛縣界烏漾石峻舟楫難通  
明季始鑿平其外又有枯木三摺梓木石瀨龍江圓潭上  
寒下寒上智咽人三港下順劍門車輪斷龍諸灘

激江在興國縣東北一名平川其源有七出自桐林埂及蜈  
蚣山者最大西會濺水西北會黃田水流二百六十里至  
平固江口入貢水

白沙江在寧都縣南二十里源出武頭峰麓南流會上團水  
自石城豐義至中團歷松湖入梅水

章水在府城西漢志名豫章水自大庾縣東流折北經南康  
會上猶水至府西環城而北於龜角尾合貢水  
貢水在府城東漢志名湖漢水源出福建汀州新樂山西經  
瑞金南過會昌北會雩都寧都石城興國信豐諸水流至  
府城東環城而北合章水

長步水在府城西北四十里源出黃家山過長村下蕩至水  
口流入贛江

桂源水在府城西北雲泉鄉自麻口經行龍下市至攸鎮入  
贛江

東韶水在府城東愛敬鄉源出雩都西北界之九山歷東韶  
會西溪流入激江

梁水在府城北一百六十里贛與萬安分界處發源龍頭嶺  
合鷺溪黃塘諸水出梁口入贛江



零水在零都縣北三十二里源出跌爛水繞東溪即漢灌嬰始建縣治地經雙橋入貢水

筠竹水在零都縣西南八十里源出高障山北合零水

化龍水在零都縣西北五十里源出雞公山西南流入貢水

渡水在縣東北一百二十里源出龍山南流會曲陽水入

寧都水曲陽水發源曲陽山距縣治一百九十七里

寧都水在零都縣北一百七十里源出寧都縣境南流合散

水篔簹黃沙長樂諸水入貢水上流有灘十二曰葛澱八

賴井洲鸕鷀藥口大傳車頭小萬苦竹長灘率口牛牯

縣水在信豐縣東三十里源出縣山至烏口入桃江又東十

里為巫水源出巫山至樟塘會龍湖入桃江

### 下入桃江

濺水源出興國縣北覆笥山有二派其西北流者經廬陵復

歸縣境入贛江其南流者至縣北門外合澱江受早禾田

嚴坑諸水凡五派

虔化水在寧都縣西五里一名虎陂舊縣以此得名

梅水在寧都縣北百二十里源出梅嶺至麻源下坡會黃土

嶺諸水至洛口與安樂新吉密石諸水合是為東江

清音水在寧都縣西北百二十里至羊灌渡與潭口水合是

為西江

湘洪水在會昌縣北七里合縣湘二水西北過零都流入貢

水深不可測蛟蜃居之其灘曰老虎湘洪北洪豬肚羊角

羊角灘長二里中有穿針龍鈎背倒鬚諸石最險迅又西

曰鷓鴣洛口愴惶龍化上橫下橫梁洪梁洪灘長五六里  
中有九曲舟人畏焉

軍山水在會昌縣南二十里源出雁門峽流入湘水

羊角水在會昌縣南百二十里舊名郎溪東達福建武平縣  
界南達廣東程鄉縣界為會昌襟喉湘水發源於此

濂江水在安遠縣南門外繞縣治西北會欣山上濂里仁小  
華江諸水流至板石始通舟楫

三百坑水在安遠縣南四十里源出三百山二十里至石口  
十里至太平保納符山水四十里至楊家砦二十里至石  
頭山入定南界納劉峯水入廣東龍川縣界

縣江水在瑞金縣東南源有二一出福建汀州白頭嶺一出  
縣東北陳石山龍池流五十里至縣前合貢水又合烏村

智水銅鉢山灞水羅田浮圖水流經會昌零都繞府城入  
贛江

渥水在龍南縣治東南源出小武當山會上皇諸山之水至  
城北匯為三江口

濂水在龍南縣東源出程嶺與定南分界至城北出三江口  
合於桃水

洒源水在龍南縣西北二十里源出峰門犁壁山合上平嶺  
鷓鴣嶺窰坑諸水至寫口溪入三江口合流而下

灞水在石城縣北源出遙嶺流至縣北門與琴水合西流歷  
三門灘龍灘迴龍灘至大瀦塘合寧都梅水

長橋水在石城縣西受福建寧化分流之水五里至亨田與  
橫江水合又有賴家畹水由浮嶺界流入寧都

西江志 卷十三  
仙嶺水在定南縣北四十五里會下歷楊梅等水流入九洲  
河合安遠水入三溪口抵廣東龍川界

鹹水在定南縣北八十里源出南坑諸山流鹹湖會龍南桃  
水

油潭水在定南縣東二十里東流入廣東和平縣下車河

河嶺水在長寧縣南十里又縣東五十里有尋鄔保水流入

廣東龍川縣之赤石渡

清溪在府城北長興鄉發源萬安南界之分水嶺經田村抵

勞田至魁星橋東注潑江

禾溪在零都縣東北源出九山嶂合水頭水至率口入貢水

龍變溪在寧都縣西北一里源出黃干嶺由蓮花白茅峰下

經響石會小桃源度化水至見龍橋遶城北與梅江小溪

江合亦稱三江口

璜溪在寧都縣南三十里流自梅川形如半壁世傳溪水有

聲如觸玉璜即出名賢明成化己丑董文僖越應之

秋溪在石城縣南源出福建汀州界流合縣前大溪

蛟湖在興國縣南門外春口埧之陰與靈湖相連世傳中有

巨魚食之多禍

潮湖在寧都縣迎旭門外一日三潮其沙如灰

龍湖在瑞金縣藍田山頂清澈如鏡旁有崖石雖盛夏亦寒

慄中有龍穴鄉人遇旱禱此

龍鐘潭在零都縣東南舊傳吳王芮遣將軍蕭武往盤古山

取鐘過此舟覆鐘沒潭底漁父時或見之岸上有將軍廟

今廢縣東北有龍窟潭在青塘南里舊有清真殿塑玉帝

西江志 卷十三  
像以鎮龍窟背通一竅吐氣濛濛潤下深百尋人墜絲探之不可窮

烏村潭在信豐縣東四十里懸崖飛瀑三級而下聚為一坎復結石穴流出作潭闊二丈許

仙女潭在興國縣北二十里而近潭廣數丈極望無際水懸注疾下有石承之作瀑布三疊而後至潭其色黝黑相傳神物居之禱雨必應東崖稍卑西崖高數十仞石竇纍纍相綴屬如大瓮側立者以百計舊名百間房知縣張尚瑗易名重甌鐫題東崖為文記之

縣前潭在瑞金縣宣文門外文廟以此潭為外泮池或云潭內曾浮出一金航蓋亦蜃樓變幻耳

肥潭在龍南縣東南八十里闊二丈許深數尺產肥魚無骨而味佳今潭已涸

燕藪潭在石城縣西十里旁有石巖石竅境內之燕寒冬多蟄于此魚骨磔潭在縣東七十里萬山間石巖倒垂小潭深靚巖上飛瀑下注蔽潭口內有拳石曰雞心禱雨者遊石上舉篙投詞須臾旋波若汲而入既入即出緣巖上奔風雨立至

獅子潭在定南縣高砂保澄澈可以滌煩

萬磔龍泓在興國縣東九十里兩崖壁立瀑布飛下數十丈聲如雷礮三折瀦為池廣二三畝深不測崖石皆蒼潤挂壁松檜為虬龍形向無遊者知縣張尚瑗搜得之有記

長信瀧在興國縣東二十五里其上之灘曰象牙羅灘百鳥瀧上釣釣六子豬牙其下之灘曰瀧下俗呼啞灘鸞公槎

口石門獅陂自此至縣北門與減水合

石婆廟灘在瑞金縣西一里許上有石婆廟因名折而南十五里其灘曰茶壺又五里曰塔石又十里曰浮橋瀧皆灘之至險者自此入會昌界

墨斗灣在會昌縣南一百二十里源出雁門峽急流三折狀如墨斗

乾渡洲在府城東磨車灣積沙如阜洲露則知諸灘水涸故名相近有洲曰藍凝

烏石洲在雩都縣西北十里俗傳洲上浮沙丈餘隱約見山川城郭之狀人或平之復浮出名曰烏石沙圖又雩峽中有米沙洲志勝云洲長二百餘丈其沙三角與常沙異色最白人視其厚薄以占米價低昂

瑞洲在興國縣東門外潏江東來減水北注此洲間之讖云瑞洲過縣前平川出狀元今為洪水所衝傾圮日甚

雙魚洲在寧都縣南一里浮卧江中如遊魚狀巨浸不沒今建晝錦亭於其上

鳳皇池在府治東南二里池中有石竹舊傳有鳳棲其上宋寶慶丁卯州守聶子述構亭扁曰鳳皇池前明建謝桓愨祠今為關廟又金鯽池在贛州衛後宋州守柴中行趙時逢相繼開拓元末廢為民居明景泰正德嘉靖間三復之而寢失其故處嘶馬池在府城通利坊宋州守聶子述建堂扁曰人傑地靈歲久湮沒明正德間知府邢珣請復之嘉靖間贛撫陸穩檄太守黃辰重為開濬

硯池在贛縣學門內以洗硯為名歲久湮塞明宣德間縣丞

趙鼎修學因復之

瑞蓮池在零都縣西二百步產異蓮其葉曰雙卷劍脊其花曰雙頭了髻三萼二十四葉其實曰覆鐘金鋌俗謂零山倒影所致移之他處輒如常種

鴨公池在信豐縣孝義坊寶塔寺左讖云鳳皇來宴鴨公池即此

洗藥池在興國縣治平觀前晉葛洪結菴鑿此有偈云洞陰泠泠風佩清清仙居永劫花木長榮

愛蓮池寧都縣有三一在縣署思莊樓下一在清軍廳後一在督糧廳後

廉泉在府城東南四里光孝寺西本張氏居一夕雷震泉忽涌出以太守廉故名宋蘇軾有詩明崇禎十三年知縣陳

履忠建書院于旁刻廉泉大社文

國朝順治十年贛撫劉武元因濂溪書院久廢改建于此洗心泉在興國縣金斗山盧禪巖前

靈泉在寧都縣金精山巖左畔兩巖合峙瀑布自巖飛注石臺流曲渠下入石竅中泉極清冽舊傳有仙以白玉杯飲于泉側酒闌反掌印石其杯陷入石中經寸明弘治間知縣怪而鑿之遂缺杯底一角歷今猶存其靈異如此

蒙泉在寧都縣西九里官人山泉自蒙巖下流白如曳線其右一泉積澗不竭名裒泉又縣西北三十里有白石泉白石罅溢出如縷寒冽甘美可辟煩悶

平章泉在會昌縣學宮內泉甚清冽有大石覆之明崇禎己卯因浚井得一磚上鐫平章泉飲必中神農記九字

濂泉在安遠縣靈寶觀後澄泓清冽為境內第一泉  
溫泉有十五在信豐會昌長寧者各一在寧都安遠者各二  
在龍南者三在石城者五石城又有熱水湖湯湖

陸公泉在瑞金縣西南東明觀前宋大觀中太常少卿陸蘊  
坐議原廟不合謫瑞金令與弟藻同遊此烹泉瀹茗有軒  
前山色依然翠溜下泉聲漱玉寒之句後召還邑人遂以  
陸公名泉舊志誤以藻兄弟為唐人今據宋史改正

獅子井在府治前通衢左右地讖云穿開獅子兩條泉宋時  
湮沒州守柴中行復之右井廢明正德間知府邢珣開浚  
又府治東坊江東廟前靈泉井烹茶味佳兼可愈疾  
三潮井在府治興賢門內崇真堂其水每日三潮滿溢井口  
明崇禎已後潮信竟不復至

知味井在雩都縣紫陽觀內舊傳泉味甘酸異日宋洪邁有  
詩明詹孟舉扁其亭曰知味

鳳皇井在信豐縣奉真觀右舊云水脈通石鼓潭出五色金  
鯉其種今絕劉婆井在縣西竹橋河里許相傳宋時有神  
僧因母劉病渴卓錫而泉出雖大旱不竭

銅鑼井在興國縣彭屋廟後井口懸崖下空汲之聲響如銅  
鈺故名

玉泉井在寧都縣按察司行署內又縣署禁內有鹹水井形  
家謂縣肖蛇此二井為蛇眼宜常疏濬

龍湫井在安遠縣西四十里上龍山泉水清冽  
銅鼓井在長寧縣南門之東又南門外有迴龍井

西江志卷第十三

西江志卷第十四

水利一

惟水潤物美利可因載筆不詳厥迹用堙藩省所倚三湖  
九津澤滙十川旁達江潯下捷禦潦匪聽於神引渠救旱  
壅則病鄰井地難復溝洫當循以義為利蓋均無貧水導  
其故苗懷其新撫字雖勞養在野人作水利志

江西水之上源其大者為章水漢志曰豫章水山海經水經  
曰贛水出南安聶都東山沙谿洞

屬崇義縣西南界

方石五色水如

滴漏至洗心橋始大東流經大庾縣合巖山和溥水雲山密

水丫山靈巖水大里水黃公坑崗山水傀儡山大明水大庾

嶺嶠水北流入之廣東仁化所出之平政水合涼熱水

寰宇記云

昔名豫水東北流入之經南康縣西南為南槩口合蓮塘蕉溪諸



水及布尾之封侯水鑊山西符水禽山禽水過山過水東流  
為芙蓉江澄淥泓深東山有港有橋皆以芙蓉名也西北崇  
義縣有樟山之潛水湖南益漿之麟潭水牛皮龍水玉泉山  
之義安水大嶂山之帶圍水即橫水經上猶縣界上猶江源出  
湖廣郴州桂陽縣流經琴江口營前彭山水入之過大猶嶂  
合稍水出石料村造水出老寨背鬪水出益漿石門水出百丈洞米  
洲水皆從東南流入章水至南康沙口又東經贛州城西環  
城而北與貢水會貢水漢志曰湖漢水發源福建汀州新樂  
山西流經瑞金縣陳石山綿江水流五十里入之又合烏村  
智水銅鉢山灞水羅田浮圖水流經會昌湘水上源為羊角  
水北流過龍石綿湘二水始合為湘洪水淵深多怪石蛟蜃  
居之盤古山墨斗灣諸水皆會而入貢水安遠濂江水南流

入之經雩都南為雩水合金溪水出鴨嶂化龍水出雞山羅茅汭

水出慈果嶺其東北石城之琴水出鷹子岡合灞水寧都之梅水

出梅嶺在邑北一百二十里非大庾之梅嶺合白沙江出武頭峰麓白鹿江出石城璜

溪又合東江之鰲溪小溪西江之龍變溪桃溪出桃林山會於吳

口渡西南流入雩水繞城而西出雩都峽其北興國之湫江

源出桐林埂及蜈蚣山合濊水出太平鄉藍坡黃田水出清德鄉龍下川

出南坑坳龍南桃水出冬桃山合筋竹葛溪諸山水為三江

口經信豐為桃江源出龍南桃嶺合黃田江出始興大竹園保昌靠頭龍南

樟木坳諸處方溪水出龍洲北江水出猶山大樂口水出大庾界安樂鄉

三江水一為新田江一為安遠會昌界一為周坑江出會巫水

出中禾溪口水出長山綿水出綿山安息江水出安遠東坑東北流至

坑洞

西江志 卷十四 水利 二

雙溪口又北爲烏漾又北會於雩水故雩都爲衆水之匯也  
貢水又西經贛州城東環城而北與章水會二水合而爲贛  
此齊都官尚書劉澄之說相沿已久雖酈道元譏其以字說  
水亦未遠失水實若謂縣治居二水之間因以名縣則說尤  
允矣城中鳳皇嘶馬金鯽三池福壽二溝之水通之長步水  
出黃家山東流入之龍溪水出黃竹嶺北流入之梁水出龍  
頭嶺西流入之皂水東流出皂口入之凡北流三百里歷十  
八灘經萬安龍溪水西流入之綿津溪水出雙坑及長仙合  
流入之蜜溪水出鷺公嶂西流入之水甘冽可瀹茗十八灘  
中惶恐灘最險上有神潭潭傍種茶甚美故諺云蜜溪水神  
潭茶贛江折而東流蘇溪水由九石陂入之雲岡水出朝天  
橋入之韶江水合黃鵠水東流入之武朔溪受風雨雲雷四

潭之水西流入之其西龍泉遂江水源出左右二溪至李派  
渡合爲一東北流入之經泰和江流澄澈故曰澄江永新拔  
鐵山出之牛吼水合龍泉之射洲江東流入之麻斜溪水合  
李陂溪水出西江口入之贛江又北經永豐西報恩江發源  
寧都西北界古名瀕水以漢孝子歐寶廬墓救虎虎啣白鹿  
以報故更名西流合葛溪黃竹溪白水麻江龍門江諸水流  
遶邑城下流爲英潭其南沙溪蕭龍發源興國界西北流合  
孤江儲溪出廬陵張家渡入贛江江水又北經吉安城東白  
鷺洲在焉宋江文忠萬里始建書院合習溪水出吉塘渡螺湖水

出五里岡

及橫石江水

在西北界吉水

安福之盧水發源

盧蕭山西

受永新之禾水勝業水及溶江

在永新東界

合毛停水閩水郭水

出郭山上

同水

出遊嶺

赤谷水

出宜春界

智溪

東流與王江會源出陳會山之舟湖水合修水於書岡下達於王江又東流合泰和之禾水一名早禾江經廬陵神岡山下同入於贛其自富田合明德水而入者為廬陵之王江廬水下流與清溪水相合者為廬陵之廬水贛江又北經吉水南為文江永豐英潭之交會也江中有青湖洲二水繞之狀若吉字故灘曰吉陽縣曰吉水又云兩水交合如文故名文亦曰字水合義昌水出文昌鄉上通蕭龍陽豐永豐幽溪沙口諸水入之南溪水出中鵠鄉東流出柘口入之經峽江東流折北舊為玉峽鎮江水東於中而不得溢合亭頭水出七里洞暮膳水出石嶺自古山漕溪逆流南入者為仁和水自漕溪北入者為蓮花潭水經新淦西湄湘水發源高嶺合秀溪水西流入之藍陂溪發源百丈峰合金灘水東流入之贛江又經臨江郡城

南為清江水蓋袁江贛江二水會於萬碩洲南繞城而北故名臨江明成化末贛水暴衝蛇溪水為銅鑼江沒田畝以千計直北流三十里與袁江會於是臨江城臨袁不臨贛也袁江者發源萍鄉羅霄山下為羅霄水東流至宜春西為稠江折而北澄清深碧名為秀江合麟橋江其源為清瀝江出老山仰山水九曲水鸞谿水經分宜南為清源渡合赤江楊江野江介溪竹橋諸水東流經新喻南為渝川縣本以渝水名唐後訛而為喻西合嚴塘江版陂江畫江東合距江出分宜灼江潁江發源蒙山合八十四源即太平江水長宣江出嶺諸水凡九十九灣八十八灘紫洲東瀛洲聯亘以障之下清江而合於贛贛江又北流至清江鎮淦水發源離嶺會沉香溪水一名閻山水出洋湖西注之蕭水亦名小陽水出古清泉里二源匯於香田由蕭洲橋

歷蕭灘鎮東注之經豐城西為劍江繞而北歷苦竹楊林金雞諸洲豐水出杯山東北流由三溪津會羅山之富水東流受百斤湖廣百餘頃株湖長十餘里銅湖亘三十里赤湖廣里餘平港湖田五百餘頃諸水又會猴峰之槎溪水合流出小港口入贛江江水北流零韶水出撫州橫汜河合隱溪水西流入之過龍霧洲即金鐘口是也杭溪水出介山匯為藥湖合瑞州水東流入之瑞州水自萬載西南八疊山有金鐘湖東流為龍江歷魚鱗灘合康樂水東流經上高南為凌江新昌之東溪來自奉新西溪來自寧州皆南流入之合鹽溪在新昌西門外清溪秀溪一名查溪有晉陶淵明遺蹟白竹港出高嶺諸水又合滕江水受小水出煙竹嶺易樂水出乾陀嶺斜口水出蒙山六口水出上石洪港水東流貫高安城南為錦江一名筠河漢志曰蜀水分

一支亘南城為市河東會於象牙潭受鐘口出荷龍口湖蛟

華陽出新喻小龍陂出米山梅口出蕭坊斜溪諸水東流抵新建界黃

源出蕭峰下銅源出香山芭蕉源諸水入之北流經南昌府城西為

章江麥源水出西山上風雨池注梅嶺下為吳源水合白石

源水入之寧州修水出黃龍山山與湖廣通城縣連界水行

修遠故曰脩江郭璞識云有水名修有魚名儵天下大亂此

地無憂受杏苑水出幕阜山百菖水出大湖山武寧鄉水出大瀉

廣瀏陽興國州及新昌界乃盜賊淵藪也東津水出州南洪水灘水灌毛嶺山下

鹿源水腰帶水出鳳皇山過州城東受安平水出毛竹山鶴源水出湖

界九及泰安鄉歛口梁溪諸水東北流經武寧縣南合義溪

水官塘源港亦名腰帶水魯溪水南受清江出銀山長田出牛

楊浦石鑊俱出嚴陽山鳳口出三卷山北受茶培山出伊東北受陂田出昇

仁鄉箸溪出雙嶺山東受磧溪出雙嶺山諸港水東北流靖安城西雙溪

水出毛竹山與寧州界一支歷南源諸都東北流達於追里一支

歷中下燥坑達於桐城合流受桃源水出九洞南流石掌灘水東

南流抵奉新與馮水合出邑南百丈山龍溪水出藥山華林水出華山縈

紆西來入之而皆會於修水安義之龍江水兆州水東陽新

徑水合於邑東為三合水并皎源出寶峰山白武斛源二水俱出靖安界

諸水東流合於修水又東北流經建昌縣南合檀陂水雲居

山之楓林西江白沙雲門諸水東流入之又合珠溪水一名

青樹灣漢元和間出明月珠大如雞子即此達於章江匯於

彭蠡星子六溪十八湖之水入之德安博陽川東南流入之

又北為女兒港德化水入之港口白沙水磧初日照之燦然

金色曰金沙洲明師殲陳友諒之卒於洲上是為西鄱陽湖

南昌城中之水曰三湖九津三湖者蘇圃迤北曰北湖由廣

濟橋至洪恩橋曰東湖同仁坊二小橋至兩學宮抵水關閘

曰西湖總名為東湖古稱十里後僅廣五里歲額魚課一百

二十金明萬曆中郡邑捐納禁不復漁九津者義取洪範九

疇所以洩三湖水廣潤門二津惠民進賢順化永和德勝五

門各一津章江門二津津各引水歸濠水關橋置內外閘湖

水盈則放水西達章江江湖俱溢則閉外閘使江水不得侵

入乃開內閘引湖達濠繞廣潤章江德勝永和四門而東注

歸蜆子艾溪二湖出牛尾閘趨楊家灘入於湖盱水發源血

木嶺過厓山北流為巴溪又北為小勳溪過泉鎮經廣昌縣

南為平西大河合南村石壁青銅諸港水北流經南豐西會

滄浪水出新軍港山蔓翠湖諸水北流經建昌郡城東川

門爲盱江說文日始出曰盱清明之意也一名盱姥江盱村  
有老母生三子服五銖衣喜食魚日於黎沮澤中取二鯉久  
之能變化遂仙去也合東江出覆山石頭港水一名梅溪出梓木山  
新城飛鳶水亦名悲猿港合荀溪西流入之東北流經金谿  
西合齊岡清江石門塗嶺后車溪出韓婆嶺東漕港諸水經撫州  
東爲汝江上流爲金谿水出上幕嶺水色如金與苦竹赤橋  
二水合流由夢港環城而北江廣流緩渟瀦如湖名曰瑤湖  
宜黃漳水發源箬嶺北流與軍峰宜水合又北流與黃土嶺  
黃水合二水合而名縣也崇仁巴水出臨川山爲臨水之源  
東北流至嚴陀大盤山寶唐水會之芙蓉山之書堂十洞二  
水分流會於李河埠而與之合東流會華蓋山之西寧水曲  
折數百里合青水東流過黃洲有長橋束之水灌則湧激如

奔馬過左港合羅山水東流合孤嶺水北流合大浮山水高  
峰山水石牛源水逕白鷺渡爲臨川至西津合汝水其北連  
礬水發源長岡出黃塘橋東流入之水比他水獨重昔人取  
以充漏刻無差節諸水相合由金玉臺出烏鵲石折而北過  
虎頭洲至金雞城東鄉三港水合金橋延橋二水西流入之  
東北流合西洛水入武陽水進賢通濟港水出香爐山流爲  
九曲至臧溪灣合獬山之院澤水優游源北流入洪源湖一  
名日月湖湖有小山東爲日西爲月涸則二漲則一中有石  
灘讖云日月湖明良將出石人灘合狀元生東歷回龍洲連  
軍山湖湖延袤五十餘里北爲白沙湖與南昌大沙小沙二  
湖接邑西羅溪嶺水流爲清溪合南陽水爲青嵐湖與洞陽  
武陽合爲三陽水至南昌東北入湖玉溪出懷玉山西流合

沙溪永平溪水又永豐溪源出福建建寧盤亭西流入之過廣信城南為上饒江西流合儲溪宋溪葛溪諸水皆出靈山為弋

陽江一名弋溪信義港自福建邵武分流入之西流合明溪水過

桃花灘經貴溪南蕪溪水合箬溪湖陵戴星諸溪水過白茫

洲洲上昔產鬱金香草故名貴溪也經安仁南為安仁江一

名錦江亦名雲錦溪水雲蕩漾如錦也白塔河合王石烏石

鵞湖河陂諸澗之水與之會藍溪水三源合流入之建昌之

瀘溪水流百三十里亦入之西北流經餘干桐口灘分二派

西北流者由布村趨龍窟河受潤陂水三源一出李梅峰一出臨川大梅嶺一出

進賢贊過樣林雲霧洲至瑞洪鎮入於湖東北流者由八字

嘴又分二支一受古埠水二源一出貴溪鶴嶺一出安仁洪大源趨馮田過黃

坊合沙港水一由破穴入市河中有越水波紋或圓如鏡或

長如練味甘且重陸羽取烹茗謂味似鏡湖水故名越也出

西津俱會珠湖趨饒河口故老云餘干水國塞破穴則龍窟

為大河塞布村則沙港西津為大河也鄱水發源江南祁門

環中合大共山之霄溪禾戌嶺之柏溪及榔木嶺武陵嶺盧

溪山諸水西流出經浮梁東之梅村始容舟三十五里會天

寶水十數里會橫槎港水至臧家灣合江家山水南合歷降

水鯉魚橋水黃壇水柘家灣水西合大演水洗馬橋水畫溪

塢水流為昌江過景德鎮經饒州鄱陽南為鄱江樂平泊川

發源德興泊山下泊灘里西流與大溪會溪出江南婺源合

浙江開化寅港水至明口與長樂水會水出大茅山合桐川

橫溪瑞港出石榴源諸水至桐山港口合建節水水出弋陽霧山

下俱西流歸大溪入樂安江江水源出徽州芙蓉嶺內河吳



















艾家塘	龍鬚口塘	千三百畝	桑陂	楊田塘	塘	水塘	田塘	東源	塘	梅家陂	陂	新庫邊塘	黃水塘	蛇鱗塘	寧州舊額泰鄉	陂	車陂	蕭陂
新田塘	上冲塘	清陂	煙陂	李家源塘	上月田塘	大冲塘	黃沙塘	曰盧陂	曰盧陂	余家陂	黃陂	潢水陂	羅冲塘	蓮花塘	張曰上平陂	黃泥陂	何家陂	石思陂
艾家邊塘	牛車塘	上南鄉	曰官	桃林塘	中月田塘	涿洲頭塘	大塘	大塘	大塘	李家陂	瓜畬陂	株嶺下塘	粟田塘	大江塘	鄧龍陂	王陂	巖下陂	角頭陂
楊坊塘	徐家塘	下南鄉	曰官	費洲塘	下月田塘	西殿頭塘	車頭塘	苦山塘	苦山塘	大洪陂	高陂	高隴塘	山田源塘	黃師塘	張梅陂	橫潭陂	楊牙陂	喻家陂
年豐鄉	曰早陂	港陂	費洲塘	散灘陂	秋場塘	石鼓塘	西殿頭塘	東山塘	東山塘	桐坑陂	董口陂	邢家邊塘	茅岡塘	李家冲塘	雞冠陂	穿石陂	清林陂	黃婆陂
曰遼陂	灌田一	磨源陂	下費洲塘	荆場塘	求場	竹林塘	西冲塘	長樂鄉	曰章	大陂	大陂	大陂	大陂	大陂	大陂	大陂	大陂	大陂

陂	石坳塘	段塘	朝家塘	黃家塘	方原塘	白竹上塘	家塘	吳家塘	下塘	塘	塘	塘	塘	塘	塘	塘	塘	塘	塘	
竹山陂	高坪塘	塋坑塘	車田塘	黃塘	郊龍塘	張塘	錢塘	吳家塘	土大塘	北塘	西塘	正源塘	諸嶺塘	平塢塘	程源塘	郭源塘	考坑塘	考坑塘	考坑塘	
徐龍塘	劉思塘	趙嶺上塘	舉臨塘	城東塘	新頭塘	東坑塘	張塘	東坑塘	宋原塘	劉塘	葛家塘	濂溪塘	朱源塘	泉坑塘	郭源塘	戴坊塘	戴坊塘	戴坊塘	戴坊塘	
李頭塘	劉思塘	趙嶺下塘	槐林塘	東塘	朱塘	東塘	吳家塘	東塘	歐家塘	黃塘	陳家塘	江谷塘	竹源塘	宋信塘	郭源塘	禾塘	禾塘	禾塘	禾塘	
石隴上塘	石隴塘	西塘	張邊塘	宋家塘	白竹塘	沙灣	吳家塘	吳家塘	宋原塘	梅山	西塘	烏石塘	西塘	西塘	西塘	西塘	西塘	西塘	西塘	西塘









彭道	蕉有	隱上	塘	官	二	草	冲	田	塘	彭	塘	帥
鐵爐	二	盧家	龍門	張家	雷	鞋	江	官	雙	須	滑	大
力田	余	家	山	大	塘	千	王	有	港	臺	石	水
社公	家	戴	龍	東	打	秋	仲	二	塘	步	下	車
邱田	彭	家	門	塘	石	太	坡	西	淨	須	彭	段
田	源	有	下	大	李	平	黃	隱	林	臺	魯	大
路	大	西	塘	東	石	橋	坡	方	塘	步	小	丁
口	礪	鄉	龍	李	前	寺	新	塘	仁	塘	水	上
上	坡	家	樹	東	中	前	田	響	鄉	塘	低	戴
家	甘	三	塘	王	歷	寺	坡	塘	田	黃	塘	方
牛	從	青	丘	家	塘	坡	下	徐	花	鄭	鄭	籍
額	下	山	家	官	黃	太	家	塘	坡	源	源	源
陳	口	有	塘	苦	山	平	坡	徐	坡	塘	塘	塘
家	對	二	方	彭	彭	早	麥	塘	鳳	塘	塘	何
黃	莊	黃	家	松	大	塘	田	張	山	鳳	塘	大
段	楊	泥	塘	林	塘	塘	坡	家	口	坪	塘	塘
楊	芭	黃	上	塘	有	有	坡	塘	石	坪	塘	萬
田							楊	塘	東	塘	塘	山

塘	山	新	塘	塘	塘	嶺	周	新	家	段	坡	坑	家	子	塘
車	楊	前	前	楊	柳	官	林	開	黃	下	白	坑	家	子	塘
函	師	湖	湖	師	柳	橋	坡	坡	石	中	沙	下	塘	塘	竹
塘	塘	塘	塘	塘	塘	王	消	萬	鄭	長	潭	盧	惠	童	園
黃	廖	元	飯	元	飯	飯	源	山	家	顧	黃	坊	塘	塘	王
土	新	雷	羅	夫	羅	山	高	高	高	院	家	坡	溪	塘	家
嶺	塘	夫	山	塘	山	塘	坑	坡	坡	明	小	口	口	塘	大
塘	子	童	茅	下	塘	塘	塘	中	陳	覺	塘	石	蒲	塘	塘
內	路	簡	塘	塘	二	有	游	源	家	坡	熊	龍	口	塘	冷
黃	坑	塘	江	石	江	北	坳	鄭	源	石	童	柴	石	塘	水
塘	下	塘	塘	嘴	塘	山	塘	坑	坡	坑	塘	段	龍	塘	塘
外	喻	子	董	塘	塘	程	北	通	劉	二	普	坡	柴	塘	塘
黃	大	路	塘	子	塘	家	山	熊	家	坡	福	消	段	塘	塘
塘	塘	坑	塘	路	塘	塘	口	家	家	有	橋	坡	坡	塘	塘
紅	下	塘	塘	塘	塘	塘	塘	家	家	山	消	楊	陳	塘	塘
菱	坑	塘	塘	塘	塘	塘	塘	家	家	山	坡	州	坊	塘	塘
塘	林	塘	塘	塘	塘	塘	塘	家	家	山	坡	口	坡	塘	塘
								家	家	山	坡	小	坡	塘	塘
								家	家	山	坡	彭	坡	塘	塘
								家	家	山	坡	姑	坡	塘	塘
								家	家	山	坡	黃	坡	塘	塘
								家	家	山	坡	沙	坡	塘	塘
								家	家	山	坡	大	坡	塘	塘
								家	家	山	坡	大	坡	塘	塘

石段陂 楓林陂 劉方陂 青水陂 辜家陂 泰清  
 陂 談陂 桃樹港陂 龍陂 山田陂 西灣陂 觀  
 前陂 板洞陂 徒陂 曹坊陂 黃陂 洪硃陂 大分陂  
 黃株陂 淵林陂 上源陂 神潭陂 西莊陂 南源陂  
 沈莊陂 黃沙陂 石頭陂 官田陂 自然塘 朗  
 田塘 高家塘 高家門首塘 西莊塘 西莊下塘 黃大塘 陰  
 冲塘 小源塘 錢坊塘 西莊塘 西莊下塘 唐冲塘 遊戲  
 塘 藕塘 新塘 萬莊塘 塌段塘 唐冲塘 大坪  
 塘

南昌府城東湖舊與江通漢永平中太守張躬始築堤以  
 通南路謂之南塘劉宋景平間太守蔡廓乃於其西起堤  
 唐元和三年刺史韋丹設南塘斗門以走暴漲築堤長十  
 二里宋嘉定中通判豐有俊築堤植柳號萬柳堤明萬曆  
 十五年知府范涑因湖淤塞檄縣挑濬涑又勘得水關橋  
 外閘久廢砌而新之并清九津水竇刻石為記三十四年  
 知府盧廷選重造內外閘創築堤岸起崇正學坊西過水

關橋口包徐孺子亭東至同仁祠右甃石五百丈有奇以  
 杜侵占并置橋五沿堤通為衢路植柳環之而南新兩學  
 宮形勝始備於躍龍橋右創建梅子真祠與故孺子亭東  
 西相峙又疊土若阜者三以固水口詳見郡人劉一焜濬  
 治東湖碑記及萬恭復豫章城三湖九津水道碑

章江堤在府城西章江門上下宋仁宗時趙槩知洪州始  
 作石堤二百丈以障其衝歷久崩壞明成化間巡視大理  
 卿夏時正因江水齧岸迫於城濠捐官銀伐石修砌未竟  
 弘治十二年知府祝瀚續成之北起龍興觀南至南浦橋  
 周公堤在府城北德勝門外明嘉靖四十二年巡撫周相  
 因江水衝沒民居括所屬陂金伐石甃岸民德之立亭於  
 北關上名曰周公亭知府盧廷選議云三湖一衣帶水至

冬可徒涉也城壕之堙者未鑿也章江堤周公堤之齧於江者尚錯落如斷岬也浚之築之以無忘前人功是役雖勤何可已焉

府城西南茅園楓樹當章貢盱汝之衝明嘉靖間知府譙孟龍築堤障民居五千餘家田數萬畝至今名曰譙堤萬公堤在府城東地名合爌每撫河水漲田塍浸沒明太常卿萬思謙捐築長堤五里許甃石閘三座以時啓閉少宰堤在羅家渡距府城西南九十里當瑞河之衝昔嘗三築三決

國朝順治乙酉年洪水傾圩一百六十丈郡人熊文舉倡募修復知縣魏雙鳳取今名

舒家墻在南昌縣嵩安鄉南通撫河舊墻窪下每春夏泛漲周廻百里田禾淹沒

國朝康熙八年郡人羅憲汶捐貲倡義更築新堤自下舒家村至鐵爐巷綿亘十餘里高十餘丈

豫章溝在東湖東北舊防東湖水溢為溝東折出城以殺其勢宋知洪州董儼張瓌程師孟先後修竣明知府范涑刻石識之

明永樂四年修新建石頭岡圩弘治十二年知府祝瀚修築南昌圩岬六十有四新建圩岬四十有一號祝公圩嘉

靖元年洪水決余家塘雙坑二圩

圩與萬家塘黃泥岭王甫巷共五圩跨南新二

邑北境下連四十八圩修治三年乃底績三十八年知府韓弼增修

南昌烏土溪閘蔭八都田濬甘家湖連珠湖邵家湖洩於斗門閘入平港鄒文莊守益有記萬曆十四年知府范涑

南昌知縣何選新建知縣余夢鯉請發贖鍰築南昌圩一百三十有八新建圩一百七十有四并修石堤石規石閘涑又請弛長河漁禁盡給災民選又用捲埽塞黃泥雙坑余家塘三決口三月功成郡人萬恭爲之記三十五年新建知縣吳家謨修圩一百六十處三十六年布政使陸長庚丁繼嗣盡蠲五所港口所趙園所樵舍所昌邑所鄔子所長河漁禁普惠災民不許豪佔凡官港及浮辦官湖高塘淺水一切罷之南昌知縣樊王家動倉穀修圩一百八十有五石規七十有六石閘十

國朝康熙十六年新建知縣楊周憲修復潤澤圩邑人陶尚澆作記又修吳城石堤長五十八丈高二十五丈周憲自記之

豐城官墻自唐永徽間始遷縣治即築堤由張家埠至寶氣亭陽靈觀周迴十餘里宋天聖間知縣事毛洵鄒嚴張宿創築石堤未備至明道二年縣令徐紹齡始成之堤凡三級級高一丈袤一百五十丈黃庠有記紹興十六年縣令胡璉再加修治高四丈廣袤各二十丈王正已有記淳熙五年知隆興府辛棄疾勅建兩埽於寶氣亭前濯纓巷口以殺奔湍慶元二年縣令林仲懿勅建稅亭石埽一併築觀巷墻七十丈聶家墻三十五丈別增子堤一十八處劉德秀有記嘉定五年運幹李燾及縣令葉庭築教家墻二十餘丈端平三年江岍多圯邑人徐鹿卿請於漕使曾用虎補埽五級淳祐五年堤溢縣令劉卿月自東菴寺至縣治西北增築土堤二百六十丈又自張埠至問津館改

砌石堤更增兩級凡三百五丈有奇徐泉谷爲之記七年  
敖家壩決邑人趙汝仁等重修元大德初達魯花赤阿刺  
威築馬湖壩三百丈又修壞堤六十四處延祐二年州尹  
江從善砌北堤明洪武三十年知縣姚瑾丞何昭善增北  
堤二埽永樂二年知縣范約丞何昭善修斗門堤增高五  
丈宣德三年堤壞巡按御史許勝奏請發民修築正統九  
年知縣朱瑄重修景泰間外堤決成化五年石堤盡圯議  
遷城於曲江冢宰李裕移書止之曰遷邑不若修堤之省  
費也知縣李廷聰委主簿黃璫修築起水口抵龍王壩凡  
三百餘丈弘治四年知縣俞振英重修二十五丈七年知  
縣劉璫修城西至仙壇壩皆砌以石并築沿城堤一千四  
百丈李裕爲之記十二年知府祝瀚增置水口石埽一敖

家壩土埽一楊文恪廉有記正德元年知縣朱諫修沿河  
石堤自陽靈觀至新廟又至馬家埠數百丈復築龍潭壩  
數百丈七年知縣吳嘉聰築普菴堂新壩十五年巡撫王  
守仁欲載苦竹洲土實敖家湖決壩不果命知縣顧佖築  
土堤於楊柳湖口築土埽於仙壇後嘉靖十五年典史胡  
桂修馬湖壩二十八年知縣韓弼增石埽一於鴉鵲壩三  
十三年知縣葛慈繼修之三十五年知縣曹大川修瓦窰  
灣狗頸壩雷公腦諸處隆慶元年通判王天性移築豐城  
馬湖內堤萬曆二年知縣顧九思修南河岍十四年知縣  
吳達可韓文相繼修熊坊壩三十四五年堤壩大壞知府  
盧廷選檄知縣張廷拱增建石埽於城西登仙壇并條善  
後八議事詳李瑄碑記三十八年知縣江朝賓增建石埽



於平豐堤四十三年馬湖堤傾圯知縣徐揚先甃以石崇  
禎九年知縣謝龍文修馬湖墻

國朝順治八年辛卯知縣宗彝修上熊坊墻丙申築烏陂灣  
及沿河墻各增高二尺庚子知縣何士錦修雞婆畚上墻  
建龍王廟鎮之辛丑大水決雞婆畚下墻上其事委丞趙  
達於蔣家厰何家腦宋坊圩一帶修葺堅固長二百餘丈  
廣十丈餘水患始平明守盧廷選議云先朝劔江偶溢輒  
欲徙縣治今持之數十百年使江如帶邑若覆盂者堤墻  
之力也議者欲盡去用夫但徵銀募役見為目前小省然  
畚鍤併起積猾攬充強半皆疲弱虛應奸胥出沒侵漁功  
什而不得一此坐費之道也夫懲噎者不廢食若以豪強  
影占人夫為慮在縣長吏籌之熟執之堅以畫地責都圖

以赴工分遠近緩急有準期會有時勞逸有量如湯令

名兆

京兼徵夫銀之法近來勘定患額之議皆豐邑世世當遵

勿變者惟是迎流設埽尤為治水第一訣約一石埽之費  
不下千餘金而長堤歲免榷薪所省亦不貲今仙壇埽平  
豐埽業已次第舉矣由唐永徽至今墻名稍易然不出縣  
治上下倘於劍江一帶伐石以障土增埽以捍流盡數十  
里金堤屹若砥柱之固雖李冰史起復出何以加哉

長樂港堤在豐城縣南十里許豐水出江之故道元時塞  
而復決明永樂間耆民楊長和具疏上聞修築兩月而訖  
工又穆湖等圩亦於永樂四年修築

繩灣墻在劍江西上接安沙下抵羅湖延袤數十里明洪  
武辛未耆民陳惟德建言修築

滕坊墻在豐城縣西七十里濱瑞河綿衍二十餘里明正統間知縣朱瑄嘗修之隨圯俗傳中有水怪乃鑄鐵牛三以鎮之典史劉忠專司其事堤遂成

曲尺灣墻在豐城縣東十五里

國朝康熙初年縣丞趙達修築

豐城各墻名目自皇華驛前至蔣家廩墻沿河計堤六里鄒家濠

至徐家湖沿河計堤十里熊坊墻至老墻沿河計堤六里深潭口至牛灣

清江界堤長二里謝仙亭至津橋頭墻堤長十里淇湖墻至塔下

墻堤長五里南寺湖至孟公墻堤長十八里小港口至劉家港堤長七里

疇西墻至徐茫圩堤長五里大港口至橋畔堤長三里安沙楊新口

至金家廩堤長十里新倉馬家墻至螺螄街堤長七里大橋墻至霍

家灣堤長四里都天廟墻至豬頭灣堤長八里連湖墻至鄒家門堤長

六里舊例有里夫力役之征每歲農隙勘明撥修

豐城榮塘在縣西二十里溉田五百餘頃尚塘在縣西三十里溉田

六百餘頃灣塘在縣東四十里溉田五百餘頃歷歲修築民食其利

白沙堤在進賢縣白沙湖湖與南昌之大沙河小沙河相

連明巡道潘昭度與邑人熊司馬明遇協謀興築

明正統間進賢知縣張冲築羅溪堤延袤二里有奇中造

橋以通溪流正德己卯之變守者斷橋毀堤後屢修屢圯

萬曆三十年知縣黃汝亨重造石橋六孔堤二百七十五

丈護以椿木植柳環之尋為洪水衝齧三十六年知縣周

光祖復築并修石橋以利涉

豐樂圩在進賢縣東北為鄱湖之西汊撫贛諸水奔流而

下饒信諸水倒灌而上淫潦不時田廬漂沒明萬曆三十

三年知縣黃汝亨修築邑人樊朝祖有記歲久圩壞  
國朝康熙三年知縣聶當世重修

明萬曆十五年進賢知縣林道楠修圩六所三十四年知  
縣周光祖築洪源堤長二里許後又修圩八所石規十一  
口四十八年知縣沈景初繕下五鄉堤岸以防湖溢

宋乾道間知奉新縣沈雲舉捐圭稅以修陂見名宦

明弘治十五年巡撫林俊疏治奉新溝洫萬曆十五年知  
縣沈天啓築圩一所曰龍船港口圩二十一年知縣馮烜  
徧葺陂堰

武寧縣磧溪水舊遶東門傍城而西至小南門上入脩水  
為縣脉東界間遇暴漲則直下孟家灣明嘉靖三年知縣  
陸浚命義民盛環砌石為堤樹以杞柳隆慶末堤漸壞萬

曆三十六年知縣周道昌補栽樹木嚴禁剪伐水復西流  
崇禎末年龍水驟發於永慶寺前直衝而出決口之築殆  
不可緩

明嘉靖三十五年寧州同知林春澤興築南門堤

按南新豐進濱於江湖倚圩為命豐城尤五郡諸水之  
交勢若覆盂無堤壩且無城也奉靖武寧不虞墊沒又  
慮衝淤矣前守建議謂山田沙磧不耕者補之助之令  
開墾如故為澤國計宜以社倉之斂發與田圩之修築  
相為表裏民生將世世賴之此關江右通省情形匪直  
為南昌一郡良策也

瑞州府

高安縣舊額信義鄉

陂塘湖圳凡八十有八

新豐第一鄉

陂塘凡一百有四十新

豐第二鄉 陂塘凡七 崇本鄉 陂塘湖凡二 洪山鄉 陂塘湖凡二

易俗鄉 陂塘湖凡九 仁孝南鄉 陂塘湖凡七 仁孝北鄉 陂塘湖凡五

有宣政鄉 陂塘凡七 務農鄉 陂塘凡三 歸厚鄉 陂塘湖凡二

永壽鄉 陂塘湖凡七 來賢鄉 陂塘凡八 旌義鄉 陂塘湖凡六 豐

安鄉 陂塘凡一 萬碩鄉 陂塘湖凡五 調露鄉 陂官塘

上高縣舊額義鈞上鄉 陂塘八 義鈞下鄉 陂塘四 感仁南上鄉 陂塘

有感仁南下鄉 陂塘二 望蔡上鄉 陂塘一 望蔡下鄉 陂塘二

有禮賢上鄉 陂塘六 禮賢下鄉 陂塘六 宣風上鄉 陂塘三 宣風下

鄉 陂塘三 千春上鄉 陂塘五 千春北鄉 陂塘七 感仁北上鄉 陂塘二

十感仁北下鄉 陂塘七 旌儒鄉 陂塘九

新昌縣舊額太和鄉 賽口陂等三十有三 宣風鄉 高家陂等六十有二

蔡家塘等二十有五 義鈞鄉 廖家陂等五十有四 新安鄉 菱場陂等三十有七

王方塘等 二十有二 天德鄉 湖城段陂等二十有五 太平鄉 寒山陂等二十有二  
白鷺坑塘 合湖陂等二十有六 廣賢鄉 菱坑陂等  
家塘等 蘇田塘等有九

南唐昇元中高安縣令陳承昭濬溝洫

明正德七年瑞州知府鄺璠推官汪濬浚市河淤塞建三

石閘以息火災堤錦江橋兩厓以石凡二千七百七十六

丈有奇叅議沈煉有修復城池記璠又請復紅菱進龍二

池侵佔嘉靖三十九年知府韓子允修築南城會以入覲

陞任後守方邦慶於四十三年十月畢城工復浚濠深七

尺廣九尺舊閘二新閘三水門四皆甃以石天啓七年知

府陶履中修築迎仙步以府署原有江西道院之稱而馬

頭為往來駐節之地故名履中自有記

國朝康熙九年知縣張文旦因古識有錦水入市河朱紫滿城多之語市河久湮雇工開濬以復故道

明天啓七年高安知縣胡承謨重建飛躍亭在南城外題東一里許簿募石築堤其下承謨自有記

喻方堤在高安縣二都明崇禎間知縣蔡國光全邑人梁維新築大泊堤在東岡腦西抵平湖附近居民修築萬碩塹在高安縣四十一都歲久傾圮

國朝順治十一年邑人胡起龍率衆修築越歲訖工蔭田數百餘頃雞塹陂在三十七都舊址在獅子山下里民汪廷朴買田移改下流蔭注數百畝

宋嘉熙間上高縣令江湘築陂堰以利灌溉上高縣裏陂受蒙末二水之流其勢衝激難成易壞舊志

謂蔭田四十五頃蓋利之最溥者古諺云若要上高米價平除是作得裏陂成明洪武八年知縣黃權因歲旱乃從民情議築兩閱月而成計工一萬三千權作裏陂行以紀其事正德間知縣趙剛有志修築先諭深村黃村勞松上下河南岍之民受其利者預開舊圳淤泥成河使水得順流而下訂期興工會遷秩未就惜後無繼之者

明嘉靖三年上高知縣陸時雍纂水利志以便一方農事於今賴之按煙竹坳泉味甘冽由花石坑謝家橋入梅沙江居民引流爲塘大泉窟在普潤山之北源小亦可灌田白馬泉在白馬山下田中迸出蔭田五十畝注西團南陂舊志皆不載係時雍勘旱報入者又小沙泉在楊梅嶺下屬全安而蔭田則及全安以下舊志謂方廣五丈泉從地

湧出里老隱蔽止報五尺丙戌夏旱時雍因勘災傷知爲舒姓所占開濬如舊

上高縣監水溝源出蒙山順流無田承蔭明弘治八年團民廖高松胡治國築堰挽流逆蔭至布張港計四百餘畝石子陂在麻塘橋花柱下承界塘之水嘉靖四年團民趙順乾築

大瀑布泉在上高縣南里團泉分二派一注爲黃蜂塘一注爲蕉塘又分爲四口蔭山前田春夏雨多流如瀑布旱則其泉暗出土名大墻坑團民爭占爲塘

國朝康熙十一年知縣劉啓泰勘明并立均水法闢爲十六更番輪注夜亦如晝之數餘流入新喻清湖

明成化間新昌知縣龔伯寧正疆界興水利人被其澤

新昌附郭古陂二曰上祿陂在縣北螺灘之上自灘頭爲渠水從北門外田間過扁嶺下出亂郭楓林瓦窰塘到龍津橋分爲二渠一渠自鍾婆湖下注營背田間復過馬家瀧繞折桂峰下灌車田一渠由龍津坊出營背鄔家巷從東頭塘青龍閣再分二渠一渠過舊學背灌田入江一渠注東門陂下曾家園經船場土地堂背繞折桂峰下合流灌車田 曰下祿陂在舊學前灘左右石橋之上元學前橋之下自對岬爲渠引水經冷家車相公塘山後鹽嶺背大橋頭直至礪口祿陂命名未詳其義或云上陂曰祿存下陂曰文曲水此邢家之言或云初築陂不成有二鹿浮江忽不見隨所渡處築之乃成說亦稍誕或云祿陂洲在舊學水口兆邑人有食祿於朝者近之二陂今廢

按錦江源出袁州萬載縣合上高之凌江新昌之藤江  
歷郡城而注章江在漢志名蜀水酈道元水經注譌爲  
濁水蓋豫章十川之巨者也兩城之中其流浩浩湯湯  
齧橋潰堤宜先時熟計焉乃各鄉陂塘名目府志闕如  
即高安縣志亦不詳載豈居官而視爲傳舍抑有故而  
盡去其籍耶夫伍廬井作封洫國僑所由稱惠人也西  
門豹爲鄴令漳水在傍而不知用史起以不智不仁譏  
之智以成仁擇可勞而勞之則勞而不怨惠而不費一  
舉斯兩得矣

西江志卷第十四

卷之四